


APOCALYPSE, KAPU YA YIYA

KITINI YA I

 Amen. Lukumu na Mfumu. [Kisika ya mpamba na bande—Mu.] . . .-mosi. Mu banza ti ya kele nkadulu ya bantu mingi. Ya kele kieleka mbote, mpangi ya kento ya ntwenya kuna, nzila ya nsuka yina. Kieleka mu me sepela na yawu. Mpe beto . . . na kukotaka na mpimpa ya Mvula ya malu-malu yayi mu banza ve ti beno lendaka yimba kima yankaka kulutila, mosi dyaka ya kulunga samu na mpimpa yayi.

² Ya ke talana mutindu ti beto ke na kubanda mvula mbote; uh-huh, na mutindu ya mbote mpe mvula ya mpembe mpe maza mingi na ngaanda, ya kele mutindu ya nsungi na Indiana na ntangu yayi ya mvula. Na yawu samu na beno bantu ya Georgie mu ke mona awa, mpe kuna na Ohio. Ntangu yayi, Mpangi Dauch, nge mpe Mpangi-kento Dauch zaba yinki ya kele, samu ti na Ohio ya kele mutindu mosi. Mpe . . . kasi, beto ke na kwendaka na Yinsi kisika ya ke vwanda ve na mosi ya yawu. Uh-huh. Beno tala dyambu.

³ Yayi kele mpimpa na ntwala ya Mvula ya Malu-malu. Mpe, kieleka, samu ti muntu nyonso me sonika ndefi mpe nsilulu yina beno ke sala samu na Mvula ya Malu-malu, mpe pene ya kilumbu na manima mbasi beno ke zenga yawu nyonso. Mpe na yawu, beno zaba, konso mvula ya malu-malu beno ke balulaka page, mpe dyaka suka ke landa beno ke vutukila, na kusalaka dyaka yawu.

⁴ Kasi ya kele kaka na kima mosi yina—yina mu ke zola kutuba, mpe ya kele mutindu yina Ntumwa Paul kutubaka, “Na kuzimbanaka bima yango yina lutaka, banzimbani ya munu nyonso mpe bima nyonso yina mu salaka, Mu ke na kukima mbangu samu na musendo ya mbokolo ya mazulu na Klisto.” Ya kele kaka kunyonga yina kele na munu kele banzimbani ya munu ya mvula me luta, mpe kitini ya luzingu ya munu ya ntama, mpe kaka na mutindu ya kulemvuka mu ke lombamba Yandi lemvo na kukima mbangu samu na musendo ya mbokolo ya mazulu. Mu ke kwikila ti ya kele kimbangi ya—ya beto nyonso, beto nyonso ke kuwa mutindu yina.

⁵ Kyadi ti ya kele mpimpa mosi ya yimbi mpe—mpe bantu me lenda ve na kukwiza. Mpe mu bokilaka Mpangi Neville, mu vwandaka zaba ve kana yandi zolaka kuma awa to ve. Mpe kuna Mpangi Skaggs me kwiza, mpe yandi ke katuka ntama mingi na Kentucky kisika kuna ya kele metele mosi to kulutila. Mpe na yawu . . . To, “Pene mutindu *yayi*,” yandi tubaka, na yawu

yandi kuzwaka kisadi bilanga yina bendaka yandi bambala zole mpe nataka yandi na zulu ya mongo na tracteur. Mpe na yawu mu banzaka, “Mbote, kana ya kele kaka basentimetele tanu to sambwadi mpe ndambu, beto ke kipe ve, uh-huh, kana ti ya vwanda kaka mutindu yina.” Kasi banzila kele mwasi mpe bantu nyonso ke na kulata.

⁶ Ntangu yayi, kieleka, nkokila yayi kele mpimpa kisika beto ke kuwaka milongi mingi, ya mutindu na mutindu yina ke kwizaka. Mpe kukondwa ntembe bawu ke luta na nkokila yayi na bantangu ya kuswaswana, tii kati-kati ya mpimpa. Mu banza ti bawu ke vwanda mpe ke tala mbote kana . . . samu na Mvula ya Malu-malu kukwenda . . . kubanda, mpe ya ntama kukwenda. Mpe bambala mingi beto ke bokilaka na autel mpe ke sambilaka mpe—mpe ke salaka bandefi na Nzambi mpe ke vutulaka bandefi ya beto—ya beto.

⁷ Mu tubaka na Mpangi Neville . . . Mpe mu bokilaka yandi na kumona kana yandi vwandaka kwiza. Mu tubaka kana yandi kwiza ve, mu ke meka na kulandila na mutindu ya mbote mu lendaka sala. Mpe kuna kana yandi lendaka kuma awa ve na suka, mbote, Mu ke landila na kusala nyonso yina mu lendaka sala na yina yandi kele—yandi kele awa ve. Mpe mu tubaka na yandi ti mu ke meka na nkokila yayi, na kubanzaka na kuzwa nsangu ya baminuti pene kumi na tanu, to kima mosi. Mpe, beto ke mona ti beto kele na milongi mingi ya kuvwanda awa, bayina ke na kuingilaka.

⁸ Na yawu mu vwandaka . . . mu banzaka ti mu ke banda mpe ke landila kaka na Buku yayi ya Apocalypse, kulandila kaka, na kubakaka kapu ya 4 ntangu yayi, kubanda. Mpe kana beto manisa ve yawu bubu yayi, kilumbu yankaka beto ke landila. Mpe kulandila na ya 5, mpe ya 6, mpe kaka mutindu beto lenda. Mfumu sadisa beto na kumanisa yawu.

⁹ Mu zola kutuba, ntete beto banda, ti ya vwandaka . . . vwandaka me kwiza tala munu mwa ntangu fyoti me luta me katuka—me katuka . . . Mpangi Drummond Thom mpe kento ya yandi. Yayi kele mama ya yandi mpe tata ya yandi ya kuvwanda awa na nkokila yayi. Mpe bawu me katuka kaka na Afrika kisika bawu vwandaka me kuzwa balukutakanu ya nene ya mpulusu ya myoyo mpe balukutakanu ya kubeluka ya Kinzambi. Ntwenya ya mama yayi hyandi bakaka, mu banza, kisika ya nkooko ya yandi ya kento, kilumbu yankaka yina, mpe na kuzwaka lukutakanu na boloko, mpe misumuki kwizaka na Mfumu, mpe nyonso. Ya vwandaka kaka mbote mingi mutindu Nzambi ke na kusadilaka bantwenya ya bankwelani yina. Bawu kele awa ntangu yayi na Amerika samu na mwa ntangu fyoti samu na kusala mwa kumwangisa nsangu.

¹⁰ Kana mosi ya beno ba-pasteur . . . Mu zola kusonika Mpangi Drummond . . . Drummond, mu, yinga, mu ke salaka mwa poto-

poto na nkumbu yango. Samu na yinki yandi zolaka kaka ve kubaka nkumbu mosi ya mbote ya Kingelesi mpe kuzimbana yayi? Beto pesa yandi kaka numelo mosi, yinki beno ke tuba, samu ti mu ke na kulenda yawu ve, ve. Mu banza ve ti ndambu ya beto ke lenda yawu. “Drummont,” mu banza ti, ya kele mutindu ya kulunga ya kuzabisa yawu; mpe Mpangi-kento Charlotte. Kana mosi ya beno ke zola kuyamba bawu, kieleka mu ke zola kuwa ti bawu me kwiza na dibuundu ya beno.

¹¹ Mama yina, Mpangi ya kento yayi Charlotte, yandi kele kaka mwana ya fyoti. Yandi vwanda pesa kimbangi kuna mwa ntangu fyoti me luta, na Meda, na kimbangi yina bawu vwandaka me kuzwa na Afrika, mpe mu ke tuba na beno ya vwandaka. . . Billy, ya vwandaka me vutula munu dyaka bantangu ya ntama; ke wakana mutindu ke zonga afrikaans. Mpe na yawu mvita ke na kulandila kuna mutindu mosi ya kele awa.

¹² Kana muntu ke zola kuyamba Mpangi Drummond samu. . . mpe Mpangi-kento Charlotte, samu na campagne na dibuundu ya bawu, kana beno ke zola, beno bokila kaka Mpangi Tony Zabel kuna na MELrose 7-3945. Kana beno ke zola kusonika yawu, bayankaka ya beno milongi, kieleka mu ke tuma Mpangi-bakala. . . Samu ti yandi kele mulongi ya mbote, mwana ya bakala ya kieleka, yina kieleka kele na nsatu ya kubanda, kubanda. Mpe yandi kele mwana ya bakala ya mbote, yina kele na boma ve, mpe mu ke zolaka yandi mingi. Ntangu yayi, beno bambuka moyo, MELrose 7-3945. Mpe mu ke bika mwa kalati yayi awa, kisika ti kana beno. . . Ya kele kalati ya bawu, mpe kana ti beno me lenda ve na kusonika numelo, mbote, beno lenda kwiza baka yawu, to ntangu nyonso na manima ya mwa ntangu ya kupema na kati-kati balukutakanu yankaka na nkokila yayi. Mpe kuzwa numelo ya bawu mpe kubokila bawu kana beno ke zola kuyamba bawu na mosi ya mabuundu ya beno samu na lukutakanu, to muntu yina beno zaba yina ke zola kuyamba bawu, samu ti bawu ke na kusalaka kaka croisade na Amerika.

¹³ Ya kele kima ve? Afrika fwana fidisa ba-missionnaire awa na Amerika! Yayi kele kisika bawu kele na bawu nsatu, kaka awa, ya kele ya kulutila yimbi na kuna.

¹⁴ Na yawu bantu yikwa kele na kyese mpe kyese ti Mfumu me bumba beno mvula mvula yankaka? Mpe awa beto kele, me kuma na nsuka ya nzila. Mpe ke sambila ti Nzambi ke lemvokila beto na nyonso ya masumu ya beto mpe bifu ya beto.

¹⁵ Ntangu yayi, mu zola kutuba yayi ntete mu banda. Mu ke zola, samu na mosi na mosi ya beno nyonso, mvula ya malu-malu ya kufuluka na kununga mpe ya kufuluka na lusakumunu mpe mavimpi ya mbote yina mu lenda zola samu na beno. Nzambi vwanda na beno! Ti beno kula mbala mosi na nzutu, mpe na kimpeve, mpe na mbongo, mpe na bima. Nyonso yina

Nzambi lendaka nata na zulu ya beno, mu ke sambila ti Yandi ke sala yawu.

¹⁶ Ntangu yayi munu mosi, ke kutana mvula ya malu-malu, Nzambi kaka zaba yina kele na bilumbu na ntuala. Mpe balukanu ya beto fwana kubakama na nswalu. Beto kele na bima ya beto nyonso. Mpangi Jim, kuna, kele na yawu ntangu yayi ya kuyilama, samu na ba-invitation mpe bima ya yinza nyonso, na yinza ya muvimba; samu na kumona kisika Mfumu ke twadisa beto. Mpe kieleka mu ke lomba bisambu ya beno bantu, samu na kusambila na ntima ya beno nyonso ti Nzambi ata mbala mosi ve kubika munu kukota na nzimbani. Mu—mu . . . Na nyonso mu zola kuvwanda, ya kele kuvwanda ya kusungama kasi kukota ata mbala mosi ve na nzimbani. Mpe ntangu yayi, mu vwandaka me kuzwa mvula mosi ya mbote.

¹⁷ Bambala mingi, bantu ke bakulaka yimbi. Mpe ntangu bawu ke tubaka, “Mpangi Branham, nge ke—nge ke . . . nge ke kwendaka dyaka ve bisika mutindu nge vwanda kwendaka, mpe mutindu milongi yankaka yayi ke salaka, mpe kele na nyonso . . .” Mu—mu me longoka kima mosi, mu me longoka leso mosi na Biblia mpe na Mfumu ya beto, ti Yesu vwandaka ve muntu ya matalana. Yandi—Yandi vwandaka ve na yawu, Yandi vwandaka ve na bumatalana. Beno me mona, Yandi—Yandi vwandaka ve muntu ya matalana, ata fyoti ve. Mpe mu ke kwikila ve ti bilandi ya Yandi kele bantu ya matalana. Bawu ata mbala mosi ve kusalaka bawu mosi bantu ya matalana.

¹⁸ Ya kele kisika mu banza ti beto me kondwa mingi kima bubu yayi, (Ya lendaka vwanda kaka dibanza ya munu.) ti, ntangu beto fwana sala kumonisa ya nene na nyonso, mbote beno zaba, mu banza ti ya ke talanaka kulutila kinsamu na ti ya kele ya santu.

¹⁹ Beno ke tala na nkwizulu ya Mfumu, bayina kieleka yambaka Yandi? Ya vwandaka Siméon, muntu ve ata mbala mosi kuwaka kima na yandi, kasi yandi vwandaka sosa Mfumu. Muntu ya kufwa meso Anne, na tempelo. Jean Mubotiki, na ntoto ya kuyuma. Mpe bayina . . .

²⁰ Jean kwendaka na ntoto ya kuyuma na mvula ya yivwa, ata mbala mosi ve kutalanaka tii yandi kuzwaka makumi tatu; na ntoto ya kuyuma. Mpe bantu ya mutindu yina vwandaka kwikila na mansweki, mpe vwandaka ya kulemvuka, bawu vwandaka vingila na nkwizulu ya Mfumu. Mpe bawu ata mbala mosi ve vwanda salaka na mutindu ya nene balukutakanu ya bawu mpe zolaka tula yawu na bapano ya nene (“Ngunga! Ntangu!”) mpe—mpe bansamununu na televizyo mpe nyonso. Ya kele nyonso ya kulunga na bayina zola kusala yawu mutindu yina, kasi, samu na munu, yina ke monana ve mutindu Klisto.

²¹ Mu zaba ti kilumbu mosi bampangi ya Yandi tubaka na Yandi, na kutubaka, “Nge ke salaka bimangu mpe nyonso yayi, samu na yinki Nge ke mata ve awa na—na Jérusalem? Mpe beto

ke na kwenda na feti ya Pake, beto ke bokila Caiphe nganga-Nzambi ya ntete, mpe bawu nyonso yina, mpe ti bawu kuzaba. Sala yawu na ntuala ya bawu mutindu yina, ti bawu lendaka mona bisalu ya Nge. Mpe ntangu yayi, mona, samu na yinki kulutila ntangu ya Nge na nkonga ya bilobi-mbisi, mpe nyonso, kuna nzadi, mpe na kalasi ya bantu ya yisi yina? Yinki . . . Samu na yinki Nge ke telama ve awa mpe kubika yinza kumona yawu?” Beno me mona?

²² Yesu tubaka, “Ngunga ya beno kele ntangu nyonso, ngunga ya Munu me kwiza ntete ve.” Uh-huh. Beno me mona?

²³ Jean vwandaka kilumbu mosi . . . Jean Mubotiki, Masonuku kuzonzilaka na nkwezulu ya yandi. Mpe ya tubaka, “Ntangu yandi ke kwiza, ti . . .” Mbote, Esaie ke tuba, pene ya bamvula nkama sambwadi mpe kumi na zole ntete yandi kubutama, “Ya ke vwanda na ndinga mosi yina ke boka na ntoto ya kuyuma.” Mpe ya ke tuba, “Myongo nyonso me dumuka mutindu mwa mameme, makasa nyonso me bula maboko ya bawu, ba me kulumuna bisika ya zulu, mpe ba me zangula bisika ya yisi.”

²⁴ Baprofesi ya mutindu yina! Yinki beno ke banza ti milongi ya kilumbu yina . . . Ntangu bawu bakaka Yawu, ba zolaka tuba, “Oh! Ntangu profete ya nene yina ke kwiza, muntu nyonso ke zaba yandi. Nzambi ke zibula kaka ba-voûte ya dizulu, ba-corridor ya Mazulu ke kulumuka, kipusu ya tiya ke kulumuka, nkonga ya bawanzio ke nata yandi na ntoto.”

²⁵ Ntangu yandi kwizaka, yandi vwandaka mulongi mosi ya kifuluka na nsuki na kizizi na kitini ya mpusu ya dimeme ya kufuka na zulu ya yandi, na kitini ya cuir mutindu mukaba. Kukondwa ntembe ata mbala mosi ve kuyobilaka; konso bangonda tatu to yiya. Kuna na ntoto ya kuyuma, me basika, me telama na kati ya poto-poto, yina vwandaka kuma tii makoto, vwandaka longi, “Beni balula ntima, samu ti Kimfumu ya Mazulu me belama!” Yandi ata mbala mosi ve kwendaka na bambanza. Kana muntu zolaka kuwa yandi, bawu zolaka kwiza na Jourdain na kuwa yandi, bayina vwandaka zola. Yinki yandi salaka? Yandi ningisaka yinsi, yandi ningisaka yinza.

²⁶ Ya kele na kuningana ke na kukwenda yina bantu zaba ve kima na zulu. Ntangu Yesu kwizaka, Yandi ata mbala mosi ve kumonisaka Yandi mosi na kati-kati ya bantu ya zulu ya nene. Yandi kwizaka na baya Yandi Mosi, Yandi kwizaka na bayina vwandaka sosa Yandi. Ya kele kisika kuningana ke kwizaka. Ya kele yina Yandi ke na kusalaka bubu yayi. Mpeve-Santu ke kwizaka na bayina Nzambi me bokila. Ya kele na kuningana ya nene na kati-kati ya Misolami. Kima ya nene, ya ngolo ke na kukwendaka, kasi yinza zaba kima ve na yawu.

²⁷ Bawu ke banza, bima nyonso yayi ya nene ya kifuluka na bafololo, mpe bansamununu na ladyo, mpe na televizyo na yinza ya muvimba, mpe mafuku ya ba-dollar ya bayinzo ya nene,

mpe nyonso, ti yina kele bima yina ke na kwenda nene. Yina kele bulawu na ntwala ya Nzambi. Nzambi ke talaka ve na bima ya nene. Yina muntu ke bokilaka “bulawu,” Nzambi ke bokilaka “Nene”; mpe yina muntu ke bokilaka “nene,” Nzambi ke bokilaka “bulawu.” “Ya sepelisaka Yandi, na nzila ya bulawu ya kulonga, na kuvulusa bayina vwandaka ya kuzimbana.”

²⁸ Ntangu yayi, Jean. Yinki beno ke banza ti bawu kutubaka? “Ya kele na fanatike kuna, muntu ya kufulukuka na nsuki na kizizi, me basika na ntoto ya kuyuma na mpusu ya dimeme ya kufuka na zulu ya yandi. Mpe, mbote, yandi kele ya kutelama na kati ya poto-poto, na makulu mwasi, kuna na lweka ya Jourdain, mpe ke na kulandilaka kuna. Nani me kuwaka ntete kima ya mutindu yayi?”

²⁹ Ntangu Yesu kwizaka. “Mesiya, me butama kuna na kidikilu, na zulu ya kikunku ya matiti, mpe—mpe bibulu ke na kudya na nziunga? Mpe—mpe beno ke zola kutuba na mama. . . Ya makangu, mutindu tata ya yandi. . . Mama zolaka vwanza mama ntete bawu kuvwanda ya kukwelana, mbote, Yandi me butama na ngaanda ya makwela. Muntu yango?” Oh, la la! Beno me mona? Kasi Yawu vwandaka Nene, bawu zabaka kaka Yawu ve. Beno me mona? Bawu zabaka Yawu ve.

³⁰ Mpe mutindu mosi Nsangu ya mbote kele bubu yayi “Nene.” Mpe Nsangu ya mbote ke na kuningisaka mutindu Yawu kuningisaka ntete ve na ntwala, kasi Yawu ke na kuningisaka yina me bikana. Ya kele kieleka, ke na kukubikaka bawu.

³¹ “Yandi kwizaka na baya Yandi Mosi, baya Yandi Mosi kuyambaka Yandi ve.” Yandi tubaka na bilandi ya Yandi, “Beni kwenda ve na banzila ya Bantu ya makanda, kasi kwenda na kisika na mameme ya kuzimbana ya Israël. Mpe, mutindu beno ke kwenda, yandi ke yamba beno me yamba Munu. Ntangu beno ke kota mbanza mosi, kana ba yamba beno ve, beno ningisa fundu—fundu ya makulu ya beno mpe beno kwenda. Mpe ya kieleka Mu ke tuba na beno, Sodome mpe Gomorrhe ke sembama mingi fyoti na kilumbu ya Lufundusu ti ya ke vwanza samu na mbanza yina.” Mpe mosi na mosi ya bambanza yango yina mangaka bantu yina kele ya kulala na bombi bubu yayi. Mosi na mosi yina yambaka bawu, kele dyaka ya kutelama mutindu kima ya kutelama na zulu ya yinzo. Ya kele kaka kieleka, beno me mona. Ya ke lombaka ntangu ya yinda na kupesa mvutu; kasi Nzambi ke pesaka bamvutu, beno kukikwamisa ve. Mu zolaka banda ve na yandi yayi, ata mbala mosi ve ti mu ke kota na Apocalyse. Oh!

Oh, mu zola kumona Yandi, kutala kizizi ya
Yandi,
Kuna kuyimba ntangu nyonso lemvo ya Yandi
ya mpulusu;

Na babala-bala ya Nkembo ti mu zangula
ndinga ya munu;
Ntangu manyongi nyonso ke luta, mpe na
nsuka na yinzo, kusepela ntangu nyonso.

³² Mu ke zolaka yawu. Beto kulumusa bayintu ya beto mwa ntangu fyoti. Beno ke zola kutelema ntete beno sala yawu? Mu—mu banza. . . Biblia ke tuba, “Ntangu beno ke telama, na kusambila, beno lemvočila.” Bantu yikwa kele na ndombolo ke zola kaka kusala yawu kuzabana na kutelemisaka diboko? Beno bambuka moyo, Nzambi ke monaka yawu, Yandi zaba nyonso na zulu ya yawu.

³³ Tata ya beto ya Mazulu, beto ke na kubelama na Busantu ya Nge ya Nzambi na Nkumbu ya Mfumu Yesu, Nkumbu yina kele nyonso ya kulunga yina kupesamaka awa na kati-kati ya bantu, na yina mpe mabuta na Mazulu mpe na ntoto kele ya kubokila “Yesu.”

³⁴ Mpe beto ke sambila, Mfumu, ti Nge ke kuzwa kuvutula matondo ya beto. Na ntete, na kubanda, mvula yayi yina ke kufwa. . . na yina beto ke na kusalaka yawu na nkokila yayi na lukutakanu, na kusalaka na kupesaka lukumu, na kulongokaka Ndinga ya Nge mpe na kuzabaka yinki MUTINDU ME TUBA MFUMU zola kutuba. Bima yikwa beto lendaka sonika na mukanda samu na kuvutula matondo! Mwa, kukima ya kubyeta yina beto vwandaka me kuzwa mvula yayi, kisika Satana zolaka kanga baluzingu ya beto, kasi Nge me manima ntete ve na beto. Na yawu beto ke na kulandila dyaka. Beto ke kwikila, Mfumu, ti beto kele kaka ya kubutama mpe ya kusansa na yinza yayi samu na kuzitisa mpe kukembila Nge.

³⁵ Mpe beto ke sambila, Tata, ti Nge ke lemvočila beto na masumu nyonso mpe nzimbani nyonso yina beto me sala na nzyetolo. Ti beto zimbana banzimbani ya beto na nkokila yayi na yina beto ke fungula yawu, na kuzikaka yawu na Mubu ya Kuzimbana, na Nkumbu ya Mfumu Yesu, beto ke timuna dyaka yawu ata fioti ve; kasi ntangu yayi beto ke na kukima mbangu na mantwala ya lukanu yayi, samu na Muntu ya kulunga yina, Klisto Yesu. Pesa yawu na nkokila yayi, Tata.

³⁶ Na yina bisadi ya Nge ke zonza, mosi na mosi ya bawu, ti Nge pakula bawu na Mpeve ya Luzingu, mpe ti bawu kulonga mutindu ata mbala mosi ve ntete, mpe kunata bansangu na dibuundu na nkokila yayi.

³⁷ Mpe beto me vukana awa na yisi ya mwa muludi yayi, yina beto ke vutula matondo samu na yawu, Mfumu. Beto ke vutula matondo na kuzwa tiya ya mbote ya kuvwandila, samu na muludi na zulu ya yintu ya beto, nyonso yina kele ya mfunu.

³⁸ Samu ti bimvwama ya beto kele ve na yinza yayi, ya kele na yinza yina ke kwiza. Nzambi, beto ke bumba yawu na zulu kuna kisika beto ke kwikila ti miyibi lenda mwangisa ve mpe kuyiba,

mpe madidi ke bebisa yawu ve, samu ti bimvwama ya beto kele Luzingu ya Kukonda nsuka. Mpe beto ke sambila, Tata, ti Nge ke bika beto kuzola yawu bilumbu nyonso ya luzingu ya beto.

³⁹ Sala beto bisadi ya kulunga. Basisa yimbi nyonso na beto, Mfumu, nyonso ya ntama. Tula yawu. . . Ti misisa nyonso ya mayele ya yimbi mpe ndudi nyonso kuvwanda ya kukatuka na baluzingu ya beto, ti beto lendaka vwanda ya kulemvuka mpe ya lembami na ntwala ya Nge. Pesa yawu, Mfumu. Ti beto kuzwa mvula ya kulutula nene yina beto me kuzwaka ntete ve, na mvula yayi ke na kwiza. Pesa yawu. Pesa beto ntangu yayi, na nkokila yayi, ya Ndinga ya Nge na yina beto ke vingila ntama samu na Bansangu ya Nge. Na Nkumbu ya Yesu beto me sambila. Amen. Beno lenda vwanda.

⁴⁰ Ntangu yayi, ya kele mutindu mpasi samu na munu na kumona monte yina kuna, mpe mu zola ve kubumba bankundi ya munu na kvingila, na yawu mu ke meka na kusala mbangu na mutindu ya nswalu mu lendaka mpe kumanisa na kitini yayi. Mpe, kana ya lendaka salama, na yina mbasi na suka beto ke meka na kutala na kulandila, kana Mfumu zola. Mpe kuna kana Mpangi Neville kukwiza ve, to nyonso, mbote, kuna mu ke meka, kana Mfumu zola, kuvwanda awa samu na kulandila lukutakanu ya lukolo ya Lumingu.

⁴¹ Ntangu yayi, beno zimbana ve ntangu yayi:

Sambila, Sambila, ya kele kaka nzila
 . . . kukuma na bantoto ya zulu mingi;
 Sambila, sambila, kisambu ya lukwikilu
 Ke nata masakumunu ya Nzambi na yisi.

⁴² Ya kele kaka mutindu beno ke sala yawu. Beto yimba yawu kintwadi. Mvula ya malu-malu yayi ntangu yayi, beto kele na ntangu mingi.

Beto sambila, sambila, ya kele kaka nzila
 Samu na kukuma na bantoto ya zulu mingi;
 Sambila, sambila, kisambu ya lukwikilu
 Ke nata masakumunu ya Nzambi na yisi.

⁴³ Na yawu kana kisambu ya lukwikilu ke kulumusaka balusakumunu ya Nzambi, beto landila na kusambila. Beto kele na kyese mingi na nkokila yayi, beto me kuzwa bizizi ya malumu na Kimfumu ya Nzambi yina vwandaka ve mvula me luta. Mpe mu ke, landilaka kaka na kusambila ti mingi mpe mingi kubwelama ntangu nyonso. Mpe ndambu me tubama ntete ve yina ya ke vwanda na lweka yankaka.

⁴⁴ Ntangu yayi, beto ke baka kapu ya 4 ya Apocalypse. Ya kele na muntu ke vwanda na nsatu ya Biblia? Beto kele na mwa Babiblia awa kana beno ke zola kulanda beto. Mbote mingi, ti mosi ya ba-huissier kubelama ntangu yayi, beto kele kaka na kikunku ya Babiblia awa. Ti mosi ya ba-administrateur, ba-huissier, to muntu, kukwiza awa na nswalu. Mpangi Zabel; ti

mosi dyaka kukwiza, mpe. Kana beno ke zola kaka kubaka balweka nyonso zole, mpe beto ke kulumuka kaka na couloir. Mpe muntu nyonso yina ke sosa Biblia, samu na kulanda na beto, mbote, beno baka kaka yawu mpe beno pesa yawu na muntu yina ke sosa yawu.

Mpe beto zola ti beno kubaka ntangu yayi na Apocalypse, kapu ya 4.

⁴⁵ Mpe, ntangu yayi, kana beno kele ya kuvwanda na manima mpe ti ke zola kukwiza na ntwala awa, beto kele kaka na bisika mingi na nkokila yayi samu na beno na kuluta. Mpe kusala beno mosi kuvwanda mbote, mpe kulanda mbote lesu mpe kusadisa munu na kutanga yawu, mpe kulongoka yawu na yina beto me vukana. Ya kele na bakiti na mantwala awa. Mu ke mona bankwelani kukwiza. Mpe awa kele kele na bakiti zole kaka awa. Awa kele na mosi samu na muntu yina kele yandi mosi kaka awa. Mpe kaka na manima awa, ya kele kaka na bakiti na mantwala awa. Mu banza ti muntu nyonso ke kuwa mbote na ba-ventilateur.

⁴⁶ Mpe ntangu yayi, bantu yikwa vwandaka me sepela na lesu ya beto yina beto vwandaka me kuzwa kaka, lesu ya bilumbu nana na zulu ya *Bansungi Sambwadi ya Dibuundu?* Matondo. Ya me sala munu mbote, samu munu mosi mpe kieleka vwandaka me kuzwa lusakumunu na yawu.

⁴⁷ Ntangu yayi, na nkokila yayi na kapu ya 4, yina beto ke manisa na nkokila yayi, Jean kuzonzaka na Nsungi ya Dibuundu ya Laodicée. Mpe, na Nsungi ya Dibuundu ya Laodicée yayi, ya vwandaka nsungi ya dibuundu ya kulutula muvusu na kati ya bawu nyonso yankaka.

⁴⁸ Mpe beto talaka ti kima ya kulutula mawa na kitini ya nsuka ya Nsungi ya Dibuundu ya Laodicée, Yesu ya kutelama na ngaanda ya dibuundu ya Yandi Mosi kisika ba tulaka Yandi na ngaanda, ke na kukonkotaka na kyelo, na kumeka na kuvutuka na kati. Yina kele ve yimbi? Mu banza ti ya kele na kutala mosi ya Masonuku ya kulutula mawa na yina mu me tangaka ntete. Yesu, na ngaanda ya kyelo ya Yandi Mosi, mpe dibuundu ya Yandi me tula Yandi na ngaanda, mpe Yandi vwandaka meka na kuvutuka na kati samu na kuvulusa bawu. “Muntu nyonso yina ke zibula, ti Mu vutuka na kati ya yinzo ya Munu Mosi, Mu ke kudya na yandi mpe yandi na Munu.” Yina kele ve . . . yina kele ve mawa? Nzambi ya Mazulu, ya kutula na ngaanda ya dibuundu ya Yandi Mosi, na nzila ya ba-credo mpe ba-dénomination ya bawu mpe mutindu bawu vwandaka sala. Me tula bawu na ngaanda . . . me tula Yandi na ngaanda ya dibuundu, na kundima credo ya bawu.

⁴⁹ Ya kele kima kaka mosi mutindu ya vwandaka kilumbu yina ba komaka Yesu na kulunsi. Mpe ya vwandaka kuna ntangu bawu ndimaka Barabbas, muntu ke kufwaka bantu, mpe komaka Yesu. Bawu bikaka muntu ke kufwaka bantu na kati-

kati ya bawu, yina vwandaka ya kusiamisa “muntu ke kufwaka bantu,” mpe ndimaka . . . mpe mangaka Yesu Klisto, Yandi yina kaka zolaka pesa bawu Luzingu.

⁵⁰ Mpe ya kele kima mosi yina konso dénomination, mpe dénomination ya Pentecote, kele na yawu bubu yayi. Bawu ke mona ti ba-dénomination yango ke kufwaka na nswalu na yina bawu ke salaka dénomination. Ya me vwandaka ata fioti ve na mosi (na—na kati ya ba-page ya masolo) yina salaka ntete dénomination mpe yina salaka kima kasi kufwaka na mbala mosi. Bidimbu nyonso, mambu ya ngitukulu, mpe makabu ke bika bawu, mpe nyonso yankaka, na ntangu kaka bawu ke sala dénomination. Mpe na kisika ya kundima Mfumu Yesu samu na kupesa bawu Luzingu, bawu vutukaka kaka mbala mosi mpe bikaka dyaka Barabbas na kati-kati ya bawu. Yina kele ve kima ya mpasi? Kukondwa ntembe ba tulaka kaka Nzambi na ngaanda ya dibuundu ya yandi, mpe ya kutelama, ke na kukonkotaka, nsungi ya dibuundu ya nsuka, na kumekaka na kuvutuka na kati.

⁵¹ Ntangu yayi, beto ke mona ti Apocalypse kele ya kukanga na bitini tatu. Ya ntete kele makapu tatu ya ntete, yina ke tala Dibundu, Nsangu, wanzio . . . na bawanzio ya Dibundu. Mpe kubanda . . . Mpe na manima Yandi ke zimbana kaka kuna na kapu ya 3, Yandi ke monika dyaka ve tii kapu ya 19, na kapu ya 19 Yandi ke vutuka. Na kati-kati ya ntangu yayi, Nzambi ke na kusalaka na ba-Juif. Mpe, kubanda kuna, ya kele na kati-kati ya mbanza ya nene ya Jérusalem, mpe kutula kidimbu ya bantu ya Israël, mpe nyonso yina, na ntangu ya nsuka.

⁵² Ntangu yayi, na yawu na nkokila yayi beto bika . . . Na mbala mosi na manima ya yayi, Jean kumonaka . . . Na kisanga ya Patmos . . . Bantu yikwa ke bambuka moyo na wapi mutindu ntama Patmos vwandaka na . . . tii simu? Wapi mutindu ntama ya vwandaka? Pene ya makumi tanu na ndambu ya bakilometele, ya kele kieleka, tii mukidi. Mpe wapi mutindu ntama ya vwandaka kizunga ya Patmos? Beno ke bambuka moyo na mwa géographie? Pene ya makumi zole na yiya na ndambu ya bakilometele na kizunga ya yawu. Mpe ya vwandaka ya kusadila na ba-Romain samu kutula muntu na lweka, bawu salaka baboloko kuna. Mpe Jean vwandaka kuna samu na yinki? Yinki yandi salaka? Yandi—yandi yibaka kima mosi? Ve. Yandi vwandaka . . . Bawu tulaka yandi na ngaanda kuna samu ti yandi vwandaka sala bantu muvusu mpe . . . to vwandaka sala kima ya yimbi? Ve. Samu na yinki yandi vwandaka kuna na ngaanda? Samu na Ndinga ya Nzambi mpe kimbangi ya yandi, samu na kulonga Nsangu ya mbote.

⁵³ Mpe kima lenda salama na Muklisto kukondwa ti ya vwanda samu na mbote? Ve, ve, ve. Na yawu samu na yinki Nzambi kubikaka yandi mosi na kisanga? Samu na kupesa beto Buku yayi ya Apocalypse. Beno me mona, Nzambi lenda bumba kaka

kima na dyabulu ntangu nyonso Yandi zola. Ve? Yandi malembe nyonso lenda. Mu ke zolaka kaka Yandi. Samu ti, mu fwana vwanda na mayela ve, beno me mona. Ntangu yayi, kana mu vwandaka na mayela mingi, mu zolaka meka na kuzimbana nyonso ya yawu samu ti mu zaba muntu ve yina lendaka vwanda na mayela mutindu Yandi. Mpe na yawu mu—mu kaka... Nyonso kele na munu, mu ke bika munu mosi na Yandi mpe kusala kaka yina Yandi ke tuba na kusala. Kaka yina. Bantangu yankaka ya kele kaka ya kuswaswana na mutindu mu banza ti ya kele. Kasi mu zaba, kana Yandi ke na kutwadisaka yawu, Yandi kele na mayela mingi. Yandi zaba yinki Yandi ke na kusalaka, munu ve. Na yawu mu ke bika kaka Yandi kusala yawu, beno me mona, na yina ya kele kaka... ya kele nyonso ya kulunga. Beno me mona? Na yawu mu ke bika kaka yandi kusala yawu. Ya kele yawu, Mpangi Neville. Inga, tata, beno bika kaka Yandi kusala yawu. Beno me mona? Yandi kele Yandi yina zaba yina Yandi ke na kusalaka, mu zaba ve. Beno me mona? Na yawu mu ke mekaka kaka ve na kusala mosi ya bafololo ya nene mpe nyonso. Mpe ke kulumusa kaka munu mosi, mpe ke tuba, “Munu yandi yayi, Tata, ntangu nyonso yina Nge zola munu.” Na yawu beno landila kaka mutindu yina mpe ya ke vwanda ntangu nyonso mbote.

⁵⁴ Na yawu, Jean, beto zolaka kuzwa ve Buku ya Apocalypse kana ya vwandaka ve Jean, mpe kana Jean kwendaka ve na kisanga. Ya vwandaka mutindu ya Nzambi na kupesa beto Buku ya Apocalypse. Yandi vwandaka kuna, mu banza, na kutala bamvula tatu, mpe na Buku... sonikaka Buku ya Apocalypse.

⁵⁵ Ntangu yayi, kuna ntangu beto bika yandi na kubokila ya nsuka, na nzila ya 22 ya kapu ya 3, “Yandi yina kele na dikutu, ti yandi kuwa yina Mpeve ke tuba na mabuundu.”

⁵⁶ Ntangu yayi, beto banda kapu ya 4:

Na manima ya yayi mu talaka, mpe, tala, kyelo vwandaka ya kuzibuka na mazulu: mpe ndinga ya ntete yina mu kuwaka vwandaka mutindu ti ya vwandaka... mpungi vwandaka zonza na munu; yina tubaka, Mata awa, mpe mu ke lakisa nge bima yina fwana salama na bilumbu na ntuala.

⁵⁷ Beto ke baka Yawu nzila na manima ya nzila. Mpe mu kele na Masonuku mingi ya kusonama awa, buku ya yawu, mpe mu zaba ve wapi mutindu ntama beto ke baka Yawu. Ti Mfumu kutwadisa beto. Ntangu yayi, beno tala mbote, Ndinga kele:

Na manima ya bima yayi (na manima ya nsungi ya Dibuundu)...

⁵⁸ Mpe nyonso yayi na bilumbu na ntuala, ntangu yayi, ke fwanakana, ke salama na ntoto na manima ya Enlevement ya Dibuundu. Beno me mona, na manima ya Luzangulu. Yayi ke vutuka awa samu na kubaka Israël. Na manima ya nsungi ya Dibuundu, na manima ya bansungi ya Dibuundu, mpe bawu...

Dibuundu ke monana dyaka ve tii Apocalypse kapu ya 19 ntangu Yandi ke vutuka na Bakala ya Yandi ya makwela. Lukumu na Nzambi samu na Makwela!

⁵⁹ Beto tanga kaka yawu. Beno ke zola kutanga Masonuku yayi na yina beto ke landila? Mbote mingi. Beto baka Apocalypse 19. Mbote mingi, tata, Apocalypse 19. Beto banda na nzila ya 7, na Apocalypse 19. Yayi kele ntangu Dibuundu ke monika dyaka, ke monika ata mbala mosi dyaka ve tii kuna na kapu ya 19.

Ti beto yangalala mpe sepela, mpe beto pesa lukumu na yandi: samu ti makwela ya Mwana-dimeme me lunga, mpe kento ya yandi me kubama yandi mosi.

⁶⁰ Oh, mu—mu lenda longa na zulu ya yawu tii kati-kati ya mpimpa mpe kutuba yawu ndambu ve. Beno tala, “Kento ya Yandi me kubama Yandi mosi.”

⁶¹ Charlie, Nellie, mpe beno nyonso, ya kele kaka yina beno vwandaka zonzila, kuna, mpe Rodney, kilumbu yankaka yina. Beno me mona? Ntangu Elisée kulosaka kilele yina na zulu ya Elie. . . To Elie na kutulaka yawu na zulu ya Elisée; yandi tandaka diboko mpe katulaka yawu dyaka, tulaka yawu na zulu ya yandi mosi mpe tambulaka na yawu na zulu ya yandi tii yandi sabukaka Jourdain, mpe kwendaka na mongo mpe mataka na kipusu, na kulosaka yawu.

⁶² Ntangu Muklisto me vuuka na ntete, kizizi ya yandi ke baluka na Klisto, na manima yandi kele na kima ya kusala yandi mosi. Yandi fwana, kima yina ke landa, kusantisa yandi mosi na bifu nyonso ya yimbi, “na kutulaka na lweka kizitu nyonso, na kukubamaka Yandi mosi. Kento ya makwela me kubama Yandi mosi!”

⁶³ Mu ke bambuka moyo na mwa disolo mosi, mu fwana tuba kaka yawu ntete beto kwenda na ntwala. Kuna na Wesete awa, mwa ntangu me luta, bamvula mingi, ya vwandaka na Kompani yayi ya nene Armour and Swift Packing Company. Mutindu bawu vwanda salaka, bawu ke basika kuna mpe ke sumba bibulu mpe ke sumba ba-ferme. Mpe bawu ke dya mbongo mingi, mpe ke sumba ba-ferme nyonso ya fyoti, mpe ke kuzwa mafuku ya ba-hectare mutindu yina, ke kumisa yayi nene, bibulu ya mbote ya Hereford na bankonga. Ya bawu. . . Ke kuzwa banzila ya bawu mosi ya masini mpe nyonso yina ke nata bibulu ya bawu katuka matiti mosi na yankaka.

⁶⁴ Mpe Amour and wift vwandaka na ferme ya nene, mpe kilumbu mosi ba vwandaka na kapita mosi kuna, mukengi ya nene, ya vwandaka, ya ferme, yandi vwandaka na bana ya bakento pene na yiya to tanu. Mpe bawu talaka ti mosi ya bampangi ya bakala ya Armour vwandaka. . . to, bampangi ya babakala ve, kasi bana ya babakala, vwandaka tambula na kutala ferme. Mpe yandi vwandaka ntwenya, bakala yina me kwelaka ve. Mpe bana ya bakento yayi kieleka bawu zolaka leba

mwana ya bakala yayi ntangu yina yandi—yandi kwizaka. Mpe na yawu bawu nyonso kukubamaka mpe kubikaka nyonso na nkwezulu.

⁶⁵ Ntangu yandi kwizaka kuna, ba zolaka kwenda kukutana yandi mpe lwataka mwa ba-robe ya bawu, yina ya ntama, na ba-frange na zulu ya yawu, mpe calibre .44 na konso luketo, mpe na bayimpu ya bawu na manima ya bayintu ya bawu, beno zaba. Mpe bawu zolaka vwanda bantu ya wesete ya ntangu nyonso, mpe mosi na mosi ya bana ya bakento zolaka kuzwa . . . Mosi ya bawu zolaka kuzwa mwana yayi ya bakala.

⁶⁶ Mpe bawu vwandaka na mwa cousine mosi—mosi kuna yina mama ya yandi kufwaka mpe tata ya yandi kufwaka. Yandi vwandaka cousine, mpe yandi vwandaka na kutala mpika na bawu nyonso yina vwandaka kuna. Mpe bisalu nyonso ya mvindu, yandi zolaka sala yawu, kusukula malonga mpe nyonso. Mpe yandi vwandaka na bilele ve, yandi zolaka baka yina ba lwataka yimeni mpe . . .

⁶⁷ Na yawu ntangu ngunga kumaka ti mwana ya bakala zolaka kuma, bawu nyonso kukotaka na ditoma ya bawu calèche mpe, bawu kwendaka, kuna na lagar na kuyamba yandi. Mpe bawu vwandaka kubula minduki, mpe bampunda vwandaka boka na malembe, mpe nyonso. Mpe bawu nataka yandi na ferme. Mpe na nkokila yina bawu vwandaka na feti ya nene. Mpe bawu kwendaka kuna na zulu ya bikunku ya matiti mpe na kibaka ya corral, mpe bawu—bawu vwandaka yimba mpe bawu vwandaka bina, mpe mpimpa nyonso. Yandi vwandaka kuna bilumbu zole to tatu.

⁶⁸ Mwa cousin yayi . . . Ntangu yayi, mu ke fwanikisa yayi na kima mosi ntangu yayi. Ba-cousine ya beto bayina kele nyonso ya kulwata, na bima ya zulu mpe mabundu ya kitoko, mpe ya ke talana mutindu kana ya kele na nkumbu mosi ya mvindu ya fwana pesama na ba-pentecotiste, kima yina kele yimbi. Bawu ke salaka kima ya yimbi mpe, kasi kima mosi ve me wakanaka, beno me mona. Bawu kele na mutindu ya classique, na yawu bawu . . . beno ke kuwa yawu ve. Kasi ti mulongi mosi ya Pantekote kusala yimbi kilumbu mosi, mpe, mpangi, mu ke tuba na beno, bawu ke mwangisa yawu na yinsi na zulunale nyonso. Yinga, tata. Ti mpangi mosi ya bakala ya pantekote kusambila samu na mwana, mpe ti mwana kufwa, konso zulunale na yinsi ke mwangisa yawu, “Kubeluka ya Kizambi kele Bufanatiki.”

⁶⁹ Mbote, na yina samu na yinki ve kutula konso dyambu na mukanda yina dokotolo ke lendaka ve? “Yina ke lunga na mosi, ke lunga na yankaka.” Beno me mona? Na yawu, kana bawu ke sala yawu, bawu ke kuzwa ve bisika mingi na ba-colonne na bazulunale samu na kusonika bantu nyonso ya kufwa. Kana mu kwenda awa na maziamu mpe mu tuba, “Muntu nyonso yina kufwaka na yisi ya kubeluka ya Kinzambi beno telama,”

mpe na manima kutuba, “Muntu nyonso yina kufwaka na yisi ya kulandilaka budokotolo beno telama,” bawu ke vwanda bambala fuku kulutila na ya ntete. Mpe ya kele kaka kieleka. Na yawu kana bawu ke zola kutonga mosi, bawu tonga yankaka mpe. Na yawu ya kele kieleka. Kasi bawu ke kufwaka mafuku na mvula landila budokotolo mpe kupasula, mpe beno me kuwaka ata mbala mosi ve dyambu na zulu ya yawu. Beno me mona?

⁷⁰ Na yawu, ntwenya ya mwana ya kento yayi, yandi vwandaka na bisalu nyonso ya ngolo ya kusala. Na yawu ntangu, na mbala mosi, mwana ya bakala. . . nkokila mosi ntangu kudya kumanisaka mpe bawu vwandaka bina, mpe mosi na mosi ya bana ya bakento yayi kubongamaka bawu nyonso, beno zaba. Mpe ntwenya ya mwana ya kento yayi ya mawa zolaka vwanda ya kulwata mwa-robe mosi ya ntama, ya kupasuka. Mpe nkokila mosi yandi vwandaka ya kuvwanda na yinzo ya kudya na manima kudya kumanisaka, mpe yandi sukulaka malonga mpe yandi vwandaka kima na manima ya lupangu samu na kulosa maza ya malonga. Yandi. . . ntangu yandi balukaka na kibaka ya corral, kuna yandi vwandaka ya kutelama, ya kuyekama na kibaka ya corral. Yandi tubaka, “Mbote.”

⁷¹ Yandi vwandaka na nsoni mingi, samu ti ya vwandaka mwana ya bakala ya mukengi ya nene, mwana ya bakala ya mfumu ya ferme. Yandi me kulumusa ndonga ya nene, samu ti yandi kutala ve ti yandi vwandaka ya kulwata bilele ya kupasuka; yandi bandaka na kuvutuka manima, na makulu mwasi, na kutalaka manima, mutindu *yayi*.

⁷² Mpe yandi belama na yandi, tubaka, “Kuvwanda ve na boma ya munu.” Yandi tubaka, “Mu zola kutuba na nge kima mosi.” Yandi me tuba, “Mu me kwiza awa samu na lukanu mosi, mu me kwiza samu na kuzwa kento.” Mpe yandi tubaka, “Mu vwandaka sosa bisika nyonso.” Yandi tubaka, “Mu vwandaka me zola ve kukwela mosi ya bana ya bakento kuna na mbanza, mu zola kuzwa yina mu banza kele kento ya kieleka.” Mpe yandi tubaka, “Na nyonso yina mu me mona, mu vwandaka tala nge awa. Mpe mu me zaba na nzila ya bisadi yankaka ti nge kele cousine ya bawu.”

Yandi tubaka, “Ya kele kieleka, tata.”

⁷³ Yandi tubaka, “Mu zola kuyufula nge kima mosi. Nge ke zola kukwelana na munu?” Mbote, yandi vwandaka zaba ve yinki ya kusala. Yandi vwandaka kieleka na nsoni, yandi—yandi zabaka ve mutindu ya kuvutula mvutu na bakala yayi.

⁷⁴ Oh, mu lenda banza kaka mutindu yandi kuwaka. Beno ve? Ntangu munu, yina vwandaka musumuki kilumbu mosi, na ata mbote fyoti ve, mwana ya munwi-malafu, Yesu Klisto me tuba, “Mu zola nge samu na Munu.” Wapi mutindu Yandi zolaka kwiza na muntu mutindu munu? Wapi mutindu Yandi zolaka tuba, “Mu ke pesa nge yinzo na Mazulu”? Wapi mutindu Yandi zolaka

tubaka, “Mu ke vulusa nge”? Muntu ya yimbi mutindu munu, wapi mutindu ya zolaka salama? Kasi Yandi salaka yawu!

⁷⁵ Yandi tubaka, “Tata, mu—mu kele ve—mu—mu kele ve ya kulunga. Mu lenda vwanda ve kento samu na bakala mutindu nge,” yandi tubaka, “samu ti nge kele ya kuyukisa na bima ya nene. Mpe mu zaba kima ve na yawu, mu kele mputu.”

Yandi tubaka, “Kasi nge kele nsodolo ya munu.”

⁷⁶ Mpe ya vwandaka ve mbote ntangu Yesu tubaka na beno ti...? Beno zabaka ti beno vwandaka ve ya kulunga na kuvwanda Muklisto. Beno, ya vwandaka ve na kima yina beno zolaka sala, kasi Yandi... Ya kele kima mosi ve... Yandi—Yandi soolaka kaka beno. Beno me mona? Yandi... Ya kele bumbote ya Yandi, kyadi ya Yandi ti Yandi soolaka beno. Beno ve soolaka Yandi, beno zaba, Yandi solaka beno. Ya kele kieleka.

Yandi tubaka, “Mu—mu ve...” Yandi tubaka...

⁷⁷ “Kutala ve na bilele ya nge. Mu ke tala ve na bilele ya nge, mu ke tala na yina nge kele.” Yandi tubaka, “Nge ke zola kukwelana na munu?” Mpe na nsuka ngwisani kusalamaka. Mpe yandi tubaka, “Mvula mosi kubanda bubu yayi, mu ke vutuka. Nge vwanda ya kukubama. Nge lwata bilele ya makwela, samu ti mu ke vutuka mpe ke kwela nge kaka awa na ntoto yayi. Mpe mu ke nata nge na Chicago, na Outer Drive, kuna kisika nge ke kuzwa chateau samu na kuzinga. Mpe kusukula nyonso yayi ya malonga ke manisa, mpe nyonso, kuna.”

⁷⁸ Ntangu bampangi ya bakento, to ba-cousine, kuwaka yawu, bawu tubaka, “Nge ntwenya ya mawa, ya kilawu, yina zaba ve kima! Mbote, nge zaba bakala yina vwandaka zola ve kutuba yawu!”

⁷⁹ Mpe ya kele ve kaka kieleka yina ba ke tubaka bubu yayi? “Wapi mutindu nkonga ya ba-exalté, nkonga ya bantu yina na mpasi lenda kusonika nkumbu ya bawu mosi, wapi mutindu bawu zolaka vwanda Dibuundu? Wapi mutindu nkonga ya mutindu yina zolaka vwanda?” Kasi ya kele kaka nyonso ya kulunga. Ntangu beto kumaka ba-fiancé mpe kuwaka bézé yango ya bu-fiançaille ya Yesu Klisto na ntima ya beto samu na kukatula disumu ya beto, Kima mosi ke tuba na beto ti Yandi ke kwiza dyaka, ya kieleka kaka mutindu yinza. Kilumbu Yandi ke vutuka.

⁸⁰ Bamvula nyonso yandi vwandaka sala, mutindu mpika, vwandaka bumba mbongo awa mwa ba-cents makumi sambwadi na tanu, yina—yina ba vwandaka pesa yandi awa mutindu difuta ya yandi na kilumbu. Mpe yandi vwandaka bumba mbongo ya yandi samu na kusumba robe ya yandi ya makwela, samu na kuvwanda nyonso ya kukubama. Oh, yina nyonso vwandaka mabanza ya yandi, na kuvwanda ya kukubama. (Mpe yandi kele... “Yandi kukubamaka Yandi mosi.”) Yandi kuzwaka bilele ya yandi, bilele ya yandi ya

makwela, na yina ba-cousine ya yandi vwandaka seka yandi mpe vwandaka sawula yandi.

⁸¹ Na nsuka ya kumaka...na kilumbu ya nsuka. Yandi kulwataka yandi mosi na kilele ya yandi ya makwela (Oh!), kukubikaka nyonso mpe kusobaka. Mpe mwa ba-cousine ya yandi kubelamaka mpe kufukamaka na ntwala ya yandi mpe tubaka, “Mbote, nge ntwenya ya kilawu. Mbote, nge zaba ti yandi zolaka ve kutuba yawu. Yandi zolaka zonza ve na... kukwela mwana ya kento mutindu nge.” Kasi, yandi kukubama yandi mosi, na mutindu nyonso.

⁸² Na yawu ngunga kumaka ntama na mpimpa, mpe bawu bandaka na kuseka yandi mpe kusawula yandi. Yandi telamaka kaka na kyelo, vwandaka vingila, na mutindu nyonso. Mpe na yawu yandi...yandi tubaka, “Na wapi ntangu yandi tubaka ti yandi ke vwanda awa?”

⁸³ Yandi tubaka, “Yandi tubaka ve.” Kasi yandi tubaka, “Kento tubaka...bakala tubaka na munu nkokila yina yandi ke kwela...to yandi pesaka munu baki ya ngwisani. Yandi tubaka, yandi tubaka na munu, ‘Ya ke vwanda na kutala na mvula mosi katuka ntangu yina.’ Na yawu mu kele na ngunga mosi me bikana.” Amen, yandi landilaka kaka na kuingila. “Mu kele na ngunga mosi me bikana, baminuti kumi tatu me bikana, baminuti kumi me bikana.” Mpe bawu vwandaka seka yandi mpe vwandaka kuseka yandi, mpe vwandaka bokila yandi nyonso.

⁸⁴ Kasi, na nsuka, kaka na ngunga yina ya mpasi, bawu kuwaka zyelo kubaluka na yisi ya bapine, bampunda vwandaka kwiza. Wapi mutindu ya kima ya zolaka vwanda na kumona ntwenya ya kento yango ya makwela yina kukubamaka yandi mosi, kudumuka na ngaanda ya kyelo, mpe kukima na kulutilaka na kibaka ya bayinti ya kufuka na ba-rose na ngaanda kuna, samu na kupumbuka na maboko ya bakala yina yandi zolaka, mpe kuvwanda bakala ya yandi, yandi bendaka yandi mutindu yina, mpe samu na kukwela mpe kunata yandi.

⁸⁵ Mosi ya bilumbu yayi, mpangi, bayina ke na kuseka mpe ke na kutubaka “exalté,” mpe—mpe “pentecotiste,” mpe bima ya mutindu yina...Beto ke na kuingilaka, beto kele dyaka na ntangu fyoti. Ba ke tubaka, “Ah, ya kele ve na luswaswanu na yina vwandaka ntete.” Beno tita ve, beto kele na ntangu fyoti me bikana. Mpe na ntangu yina kaka yina Yandi silaka, Yandi ke vwanda awa. Mpe mosi ya bilumbu yayi beto ke pumbuka mpe ke kwenda. Beno kubama kaka! Beno vwanda kaka ya kulwata Kilele ya Makwela! Beno basisa buyimbi nyonso na ntima ya beno. Nyonso yina... .

⁸⁶ Beno kuwa mutindu Masonuku yayi ke tangama awa:

Ti beto yangalala mpe sepela, mpe beto pesa lukumu na yandi: samu ti makwela ya Mwana ya dimeme me

lunga, mpe kento ya yandi me kubama yandi mosi.
(Beno me bakula yawu?)

Mpe na yandi kupesamaka ti yandi zolaka vwanda ya kulwata na lino ya mbote, ya kutsyema mpe ya mpembe: samu ti lino ya mbote kele ludedomo ya basantu. (Lukumu na Nzambi!)

Mpe yandi tubaka na munu, Sonika, Ya kusakumuna kele bawu yina ba me bokila na kudya ya makwela ya Mwana ya dimeme. Mpe yandi tubaka na munu, Bayayi kele bakutuba ya kieleka ya Nzambi.

⁸⁷ Na yawu ya ke vwanda na lukutakanu na zulu mosi ya bilumbu yayi, ntama, mingi ve. Uh-huh. Beno vwanda kaka ya kukubama! Beno bika beno mosi ya kukubama! Beno sukula ntima ya beno na mabanza nyonso ya yimbi. Beno vwanda na lukwikilu na Nzambi, ata mutindu mudidi ya ke talana mpe ata lutangu ya bantu ke seka mpe ke moke mpe ke tuba, “Beno me sala foti.” Beno landila kaka na kuzinga ya santu mpe kuzinga samu na Nzambi. Beno landila kaka na kukwenda na ntuala, ngunga ke kwiza!

⁸⁸ Na yawu, beno me mona, Yandi ke monana dyaka ntangu yayi na Apocalypse 19:

Na manima ya bima yayi... (Na manima yandi monaka nsungi ya Dibuuundu.)

Na manima ya bima yayi mu talaka, mpe, tala, kyelo...

⁸⁹ Ntangu yayi, beno bambuka moyo, Jean kele dyaka na Patmos. Mpe na manima yandi na kumonaka bansungi nyonso ya dibuuundu kuluta:

... mu talaka, mpe, tala, kyelo vwandaka ya kuzibuka na mazulu:...

⁹⁰ “Kyelo.” Yinki kele Kyelo? Apocalypse 3:8. Na Apocalypse, kapu ya 3 mpe na nzila ya 8, “Mu zaba bisalu ya nge. Tala, Mu me tula na ntuala ya nge Kyello ya kuzibuka yina muntu ve lenda kanga yawu, lenda kanga mpe muntu ve lenda zibula.” Yandi kele Kyelo! Kyelo! Klisto kele Kyelo. Yandi tubaka, na Santu Jean 10, “Mu kele Kyelo ya lupangu ya mameme.”

⁹¹ Mpe na yinsi ya ntama, beno ke tala ti mvungi ke kotisaka na kati mameme ya yandi. Na manima yandi me tanga bawu mpe me mona bawu kele nyonso na kati, kuna yandi ke lala kaka kuna na kyelo. Yingo lenda kota ve kukondwa kuvumbula yandi, to dimeme ya yandi lenda basika ve kukondwa kuluta yandi. Oh, wapi mutindu ya kukeba ke kuwa mameme samu ti mvungi kele ya kulala kuna na kyelo.

⁹² Noé, na Ngwisani ya Ntama, kutelamaka na kyelo ya nzasa. Oh, beno kuwa; mu ke tuba kima mosi! Yandi telemaka na kyelo mpe vwandaka longa kubalula ntima mpe ludedomo na bantu

yina vwandaka seka yandi. Mpe na kyelo mosi yango yina yandi vwandaka ya kutelama, muntu ve zolaka kota na nzasa kana ti na kyelo mosi yango. Yankaka ve kasi na kyelo mosi na nzasa.

⁹³ Mpe ya kele kaka na Nzila mosi! Mbote mingi, Mpangi...?. . . Ya kele kaka Nzila mosi yina ke kotisaka na Nzutu ya Klisto. Ya kele kaka na Kyelo mosi na Dibuundu ya Nzambi ya moyo, mpe Yesu kele Kyelo yango! “Mu kele Kyelo! Mu kele Nzila, nzila yina ke twadisaka na Kyelo. Mu kele Kyelo ya lupangu ya mameme.”

⁹⁴ Yandi tubaka na nsungi ya dibuundu yayi, “Mu me tula na ntwala ya nge Kyelo ya kuzibuka.” Yandi tubaka ti samu na nsungi ya dibuundu ya ba-méthodiste, bawu me pesa Yawu mukongo, bawu me kota na organisation. “Kasi mu me tula na ntwala ya nge Kyelo ya kuzibuka.” Ntangu yayi, na manima bawu kuzwaka kusantisama, Yandi tubaka, “Mu ke tula Kyelo ya kuzibuka,” yina kele Mpeve-Santu. “Na nzila ya Mpeve mosi beto nyonso kele” (wapi mutindu?) “ya kubotama na kati ya Nzutu mosi yina kele Klisto.” Yandi tulaka nsangu yina na ntwala ya dibuundu ya ba-Methodiste mpe bawu balukaka na Yawu. Bawu kumaka na kusantisama mpe mangaka Mpeve-Santu. Beno ke bambuka moyo na yawu? “Kyelo ya kuzibuka” yina.

⁹⁵ Wapi mutindu beno ke kota na kati ya Klisto? Na nzila ya Mpeve mosi, Mpeve-Santu, yina kele Mpeve ya Klisto. Beto ke kotaka na kati, ve na nzila ya kupesanaka mbote, ve na nzila ya kumwangisa mwa maza, kasi na nzila ya mbotika mosi ya Mpeve-Santu beto nyonso kele ya kubotama na kati ya Nzutu mosi mpe bayina ke kota kintwadi na Nzutu yango. Mbotika mosi ya Mpeve-Santu na Kyelo yina.

⁹⁶ Kyelo yayi kele na Mazulu, Kyelo yango, ntangu yandi talaka na zulu yandi monaka Mfumu Yesu. Beno tala kaka mbote kitini ya yawu yina ke landa yawu. Kyelo yina, Mfumu Yesu.

. . . mu talaka, mpe, tala, kyelo vwandaka ya kuzibuka na mazulu: mpe ndinga ya ntete. . . mu kuwaka vwandaka. . . ndinga ya mpungi. . .

⁹⁷ Ntangu yayi dyambu ke na kusobaka. Jean vwandaka tala mbote Patmos, mpe ntangu yayi yandi talaka na zulu. Samu na yinki? Yandi kumonaka kima kusalama na zulu ya ntoto awa (bansungi ya dibuundu yayi), nzila nyonso na Bansungi Sambwadi ya Dibuundu, mpe kuna na manima yandi me mona bansungi ya dibuundu, na manima ya yawu, na manima bansungi ya dibuundu me suka, yandi kuwaka Ndinga. Mpe yandi talaka kuna na Mazulu mpe yandi monaka Kyelo ya kuzibuka, mpe Ndinga ya ntete kuwakana mutindu mpungi. Mbote mingi, dyambu sobaka katuka Patmos na Mazulu.

⁹⁸ Ndinga vwandaka Ndinga mosi yina tambulaka na kati ya minda sambwadi ya wolo; Ndinga mosi, Ndinga sobaka ve. Kasi,

Ndinga, wapi kisika Yawu vwandaka ntangu yandi kuwaka Yawu mbala ya ntete? Bantu yikwa ke bambuka moyo, na nsungi ya ntete ya dibuundu? Na manima ya yandi. “Mu vwandaka na kati ya Kimpeve na kilumbu ya Mfumu,” Apocalypse 1–1:10. Na yawu yandi. . . “Na kati ya Kimpeve.” Kana beno ke zola kusonika yawu na Apocalypse 1:10 mpe 13, “Mu vwandaka na kati ya Mpeve na kilumbu ya Mfumu, mpe mu kuwaka na manima ya munu mutindu Ndinga ya mpungi mpe yina vwandaka bula mutindu bamaza mingi. Mpe ntangu mu balukaka samu na kutala, mu monaka Mosi ya kutelama na kati-kati ya minda sambwadi ya wolo.”

⁹⁹ Ntangu yayi, na manima Yandi lakisaka yandi dinsweki nyonso ya minda sambwadi ya wolo yango (na kusimbaka bambwetete sambwadi, mpe ya kulwata peluke ya mpembe, mpe nyonso yina, mpe makulu mutindu kisengo, mpe meso mutindu tiya, bidimbu), na manima yandi kuwaka Ndinga mosi (Beno tala mbote.) na kuzonzaka katuka Mazulu. Mpe yandi talaka na zulu mpe yandi monaka Kyelo ya kuzibuka. Oh! Kyelo ya kuzibuuka na Mazulu! Wapi mutindu beto ke kota na kati? Na nzila ya Klisto Yesu, Mwelo mosi yina, Nzila mosi, nzila yankaka ve.

¹⁰⁰ “Muntu nyonso yina ke mata na mutindu yankaka, mutindu mosi kele muyimbi mpe kimpumbulu.” Mpe na kingana ya muntu yina mataka mpe yina vwandaka na Kudya ya Makwela kukondwa kulwata kilele, yandi vwandaka ya kuzaba dyambu, mpe ba kangaka yandi mpe losaka yandi na kati ya mudidi. Kaka Nzila mosi, na kukwiza na Kudya ya Makwela. Mu banza mu longaka na yawu awa ntama mingi ve. Ntangu bakala ya makwela. . . Ntangu muntu vwanda. . . vwanwanda kwelana na yinsi ya ntama, yandi zolaka pesa bakubokila yandi mosi, yandi zolaka pesa yandi mosi ba-robe. Na yawu ntangu yandi kutanaka muntu yayi kuna, yandi na kuvwanda na mesa ya kudya. . . Bantu yikwa ke bambuka moyo na kingana? Kieleka, beno bayina ke tangaka Biblia. Mpe yandi talaka muntu na mesa ya kudya kukondwa kulwata lele ya makwela.

¹⁰¹ Yinki ya kele? Bakala ya makwela ya kutelama na kyelo mpe bawu nyonso ke kwiza na kubokila. “Muntu ve lenda kwiza na Tata kana na nzila ya Munu. Bawu nyonso yina Tata me pesa Munu, to me bokila, ke kwiza na Munu.” Awa bawu ke kwiza, ke pesa kubokila ya bawu, na bakala ya makwela, samu ti muntu nyonso kutalana mutindu mosi. Ya kele kima mosi ya mbote, na ntangu ya ntama, na lukwikilu ya Mpeve-Santu, ya vwanwanda sala bawu nyonso kutalana mutindu mosi. Ata ti bawu kele mvwama to mputu, muntu ya bundongo to muntu ya kimpwanza, muntu-ndombe to mundele, bakala to kento, bawu nyonso kele mosi na Klisto Yesu. Mpe bakala ya makwela vwanwanda ya telama na kyelo mpe vwanda kuzwa kubokila, ke tula robe na muntu yayi, samu mvwama mpe mputu kutalana mutindu mosi. Ya kele mutindu ya kele na Kimfumu ya Nzambi, ya kele ve na

bantu ya nene mpe bantu ya fyoti; bawu nyonso kele bantu mosi, nyonso mosi kati na Klisto.

¹⁰² Ntangu yayi, yinki beno ke banza ntangu Bakala ya makwela ke vutuka mpe ke tala muntu ya kuvwanda kuna kukondwa Lele ya Makwela? Yandi ke tuba, “Nkundi, wapi mutindu nge me kota awa?” Mpe ti yandi kutelama kukondwa kuzonza dyambu, ya ke lakisa ti yandi kotaka na ngaanda ya Kyelo. Yandi kotaka na nela, yandi kotaka na kyelo ya manima. Mpe Yandi bokilaka yandi nkundi, ya ke lakisa ti yandi vwandaka mambele ya dibuundu, “Nkundi, wapi mutindu nge me kota awa kukondwa kulwata lele?” Ntangu yayi, Yesu tubaka yayi, Yandi mosi. Mpe Yandi bokilaka mukengi ya kyelo, Yandi tubaka, “Kanga yandi, makulu mpe maboko.” Mpe ba losaka yandi na kati ya mudidi kuna kisika ya ke vwanda na kudila, manyongo, mpe kukwetisa meno. Yina kele Bandinga ya Klisto Yandi mosi, (Kieleka.) “Ba losaka yandi na ngaanda.” Samu ti, ya ke siamisa ti, kukondwa Lele ya Makwela, yandi me kota mutindu mosi yankaka na ngaanda ya Kyelo. Kana yandi zolaka lutila na Kyelo, yandi zolaka kuzwa Lele ya Makwela.

¹⁰³ Oh, beno kuwa yayi! Na yina kana lele ya Makwela kele mbotika ya Mpeve-Santu, wapi mutindu ba ke monikisa beto na mutindu yankaka? Kana nsungi ya dibuundu ya ntete fwana lutila na Kyelo, Klisto Yesu, kubotama na Nkumbu ya Yesu Klisto, kuzwa mbotika ya Mpeve-Santu, samu na kulwata Lele ya Makwela, wapi mutindu beto ke kwiza na mutindu mosi yankaka? Kana beno lutila na ba-Méthodiste, na ba-Baptiste, to na ba-Pentecotiste, to na dénomination mosi yankaka, ba ke kanga beno mpe ke losa beno na kati ya mudidi. Beno fwana lutila na Klisto Yesu, Nzila, Kyelo, Kieleka, Luzingu. Amen!

¹⁰⁴ Mbote mingi, Ndinga mosi, Apocalypse 21, to, Apocalypse 1:10 mpe 13. Mpe mu zola beno kutala, Ndinga yina yandi kuwaka kuzonza na yandi vwandaka wakana mutindu mpungi. Beno zaba mutindu mpungi ke wakanaka, ya ke pesaka makelele ya ngolo. Yinki mpungi ke zola kutuba na Biblia? Mvita. Konso ntangu beno ke mona mpungi kubula, na mvita. . . na ntangu ya Biblia, makelele ya yawu vwandaka zola kutuba mvita, to luzayikisu to kima ke salama.

¹⁰⁵ Ntangu yayi, yandi. . . Na manima bansungi ya dibuundu sukaka, mpe nyonso kukubamaka, kukubikaka kuvwanda ya kapu ya 4 awa, bansungi ya dibundu kusukaka. Yandi katukaka yimeni ntoto, beno me mona. Beno bambuka moyo, Ndinga yina zonzaka na yandi, na manima ya yandi, na kati ya minda sambwadi ya wolo, kisalu kumanisaka. Mpe ntangu yayi Ndinga mosi yango vwandaka zonga kuna na Mazulu. Yinki ya vwandaka? Yandi vulusaka yimeni bantu ya Yandi. Kisalu ya Yandi na ntoto kumanisaka, mpe Yandi vwandaka na Nkembo, na kubokilaka Jean, “Mata awa!” Uh-hum. Amen! Yina ke sala munu mutindu kuboka na mpimpa yayi ya Mvula ya Malu-

malu. Oh, la la! Beno bawu yayi. Beno me mona, kukubama, “Mata awa!”

¹⁰⁶ Mvita! Yayi kele kuvwanda ya mvita ya nene; bantu yina mangaka Nsangu ya Nzambi, mangaka Mpeve-Santu, Munatinsangu ya mabuundu sambwadi. Muntu yina mangaka Nsangu yayi ya Yandi ya lemvo vwandaka na kima ve yina bikanaka, kasi lufundusu vwandaka ya kukubama, na yina Yandi vwandaka kubama samu na kumwangisa bampasi na zulu ya ntoto awa. “Mata awa mpe Mu ke lakisa nge yina ke na kukubamaka na kusalama. Klisto na kulosaka, misumuki ya kukondwa Nzambi, Mu ke zola kumwangisa nganzi ya Munu na zulu ya bawu.”

¹⁰⁷ Beno tala mbote kuvwanda. Oh, na yina beto ke na kulutilaka bankokila beno ke kuzwa mingi ya yawu mpe mingi ya yawu ntangu nyonso. Beto lenda ve kuzwa nyonso awa, beto fwana landila na kutalaka kisika na kisika. Mutindu ya ke vwanda kima mosi ya boma samu na bayina ntangu mpungi ya nsuka ke wakana, mpe ntangu mvita ya nsuka ke nwanama, ntangu dilongi ya nsuka me longama, ntangu nkunga ya nsuka ke yimbama, mpe beto ke telama na Kiti ya Lufundusu ya Klisto. Ba ke yufula beno, “Samu na yinki beno kuzwaka Yawu ve? Yinki beno salaka na Luzingu yina Mu pesaka beno?” Ba ke lomba beno na kupesa kikuma. Na manima yinki?

¹⁰⁸ Beno me kuwaka munu kuyimba nkunga yina, to kumeka yawu:

Na manima yinki? Na manima yinki?
 Ntangu Buku ya nene me zibuka, na manima
 yinki?
 Ntangu bayina mangaka Nsangu
 Ba ke lomba bawu na kupesa kikuma, na
 manima yinki?

¹⁰⁹ Beno ke telama kuna, kaka kieleka mutindu Buku yayi kele ya kusonama. Beno ke vwanda . . . beno ke telama kuna mpe ba ke lomba beno kikuma. Oh, ya ke futaka beto, mpangi ya munu ya bakala, mpangi ya kento, ya ke lomba beto, mutindu bana ya babakala mpe bana ya bakento ya Nzambi, na kufyongonina beto mosi konso ngunga na kilumbu. Paul tubaka, “Mu ke kufwaka konso kilumbu. Kasi mu ke zinga, munu ve, kasi Klisto ke zingaka na kati ya munu.” Beno me mona? Beno fyongonina, samu ti beno zaba ve wapi ngunga ba ke bokila samu na kupesa mvutu na Zulu.

¹¹⁰ Ntangu yayi, “Kuwaka Ndinga ya mpungi.” Mbote mingi. Beno note, note yina Jean tubaka, yandi tubaka awa, na kitini ya nsuka ya kapu ya 1te yayi:

. . . *ndinga ya ntete . . . vwandaka . . . mutindu mpungi*
yina zonza na munu; mpe tubaka, Mata awa, . . .

Mata awa! Mu ke lakisa nge bansungi ya dibuundu na zulu ya ntoto; ntangu yayi mata *awa*, mu ke lakisa nge kima yina ke salama na zulu awa.

111 Beno me mona, Klisto me bika yimeni ntoto, Yandi me mata na Nkembo, Nsungi ya Dibuundu vwandaka me luta, ya ke lakisa ti Mpeve ya Yandi kumanisaka awa. Mpe Yandi kwendaka na Nkembo mpe vwandaka bokila Jean na kumata, mpe Yandi lakisaka yandi yina yankaka zolaka salama. “Mata awa.”

112 Ntangu yayi, beto talaka Jean, na kapu ya 2 . . . na nzila ya 2. Beno tala, na nswalu, Jean kubwelaka yayi:

Mpe na mbala mosi. . . (Amen!)

113 Oh, kana mu ke sala mutindu kusekisa, mu ke na kuwa kaka mbote. Jean bwelaka:

. . . na mbala mosi mu kotaka na kimpeve: . . .

114 Ntangu beno ke kuwa Ndinga ya Nzambi kuzonza na beno, kima ke salama. Amen! Oh, ya me salamaka na beno mutindu yina? Ya salaka na munu, bamvula makumi tatu na mosi me luta, mpe ata mbala mosi ve mu me vwanda mosi tuka. Oh, ntangu Yandi tubaka, “Beno kwiza na Munu, beno nyonso yina kele ya kulemba mpe ya kizitu ya kulutila mingi, Mu ke pesa beno kupema.” Yawu sobisaka munu.

115 Jean tubaka:

. . . na mbala mosi mu kotaka na kimpeve: . . . (Wapi mpeve? Mpeve-Santu. Oh!) . . . mu kotaka na kimpeve: mpe, tala, kiti ya kimfumu kutulamaka na mazulu, mpe muntu vwandaka na zulu ya kiti yango ya kimfumu.

116 Beno me mona, Jean bikaka ntoto awa. Klisto bikaka ntoto (na mutindu ya Mpeve-Santu) mpe vutukaka dyaka na Nzutu. Bubu yayi Nzutu kele ya kuvwanda kuna mutindu lubambuku, mutindu munkayulu. Beto ke kota na yawu kaka na yisi na kapu awa. Kasi Mpeve ya Klisto vutukaka na luzingu na kati ya Dibuundu, samu na kuzinga na kati ya beto.

117 Ntangu yayi, na mbala mosi na manima Yandi lakisaka nsuka ya nsungi ya kisalu ya Yandi awa, Yandi mataka na Mazulu, Yandi tubaka, “Mu ke lakisa nge yina ke vwanda na manima ya yayi, na manima ya bansungi ya dibuundu.” Yandi tubaka, “Jean, Mu lenda dyaka ve kuzonza na nge kuna na yisi, samu ti Mu me katuka na yisi awa, Mu me mata na Zulu mingi. Mata awa na Munu!” Amen! “Mpe Mu ke lakisa nge yina ke salama na bilumbu na ntwala.” Oh, la la! Hmm! Oh! Kota na vision, kota na Nkembo.

118 Kimbangi ya yandi zolaka vwanda kima mutindu yina ya Paul. Ya Zole ya Corinthiens 12:2 mpe 4, kana beno ke na kusonikaka yawu. Ya Zole ya Corinthiens . . . 2 na 4. Paul kukotaka kilumbu mosi, na . . . na vision, mpe. Beno zaba yawu? Mpe yandi monaka bima yina vwandaka ve ya kulunga samu na

yandi na kuzonzila mpe; bamvula kumi na yiya, kutubaka yawu ata mbala mosi ve. Beno me mona? Kasi beno kuwa luswaswanu na kati-kati ya bawu.

119 Yina Paul kumonaka, ba yiminaka yandi na kuzonzila na yawu to kubasisa yawu na ntwala ya bantu. Oh, la la! Mu ke kwikila ve ti yandi zolaka sala yawu. (Samu ti, mwa nzyetolo yina mu salaka kilumbu mosi, mu sabukaka yawu ve mpe ke lenda ve.) Beno me mona, yandi—yandi monaka bima yina yandi lendaka ve kuzonzila. Mu banza ti yandi vwandaka ve na bampova ya . . . ba zangulaka yandi na mazulu ya tatu, ata yina. Beno me mona, kuna na Mazulu ya tatu.

120 Wapi luswaswanu ntangu Jean kotaka mpe monaka Yesu, yandi vwandaka . . . Yandi tubaka, “Sonika yawu na buku yina nge me mona mpe pesa yawu, fidisa yawu na mabuundu.” Paul ba yiminaka yandi na kuzonza, mpe na Jean ba lombaka na kutula yawu na buku samu ya luta nzila nyonso na bansungi. Oh, la la! Ya me monisama ntangu yayi, ke monana na bilumbu ya nsuka yayi. Ya monanaka ve na bilumbu ya yandi, ya me monana ntangu yayi na yina beto ke na kwenda.

121 Oh, beno tala, Jean, kubakamaka na zulu na mbala mosi na manima ya nsungi ya dibuundu, ya vwandaka kifwanukusu ya Dibuundu ba me zangula. Na mbala mosi na manima nsungi ya dibuundu me suka, Nsungi yayi ya Dibuundu ya Laodicée, na manima ke kwiza Enlevement. Dibuundu ke mata mutindu Jean kusalaka, na kati ya Mvwandulu ya Nzambi. Oh, la la! fiu! Yina ke pemisa kaka moyo ya munu. Kukota na Enlevement ya Dibuundu! Mpe Yawu tubaka . . . Kisika yayi, Buku ya Apocalypse, kusonamaka, beno me mona, na nsuka ya nsungi ya dibuundu.

122 Ntangu yayi, mu kele na mwa kima mosi awa yina mu zola kukumisa pwelele ya me tala kima yina vwandaka singa ya ntama na ntangu ya yinda na kati-kati ya Miklisto mingi. Mpe mu vwandaka banza bubu yayi, ntangu mu vwandaka tanga, vwandaka sonika Masonuku, mpe vwandaka tala bankumbu mpe bantinta ya mutindu yankaka mpe nyonso. Beto ke kota na yawu na manima ya mwa ntangu, mukyama mpe bidimbu, mpe nyonso yina. Mu vwandaka sonika Masonuku yayi awa samu ti mu lendaka vutukila na kutalaka yawu mpe kutala na yawu, kana mu . . . na yina mu ke kwenda na ntwala. Samu ti, bambala mingi, kana mu zola kuzonza na dyambu mutindu yayi, mu ke . . . mu ke vwanda mutindu yankaka, mu ke meka na kuza yawu na ntima. Kasi mutindu yayi, ntangu beno kele kaka na ntangu fyoti, mu ke zolaka kutala na yawu samu ti ya ke kwendaka nzila nyonso na Masonuku, manima mpe mantwala.

123 Ntangu yayi, na Matthieu 16:13, beto ke tala yayi, kana samu na beno bayina ke kusonikaka Masonuku. Matthieu . . . Kana beno zola kuvutuka . . . kana beno zola kubaka yawu,

mbote mingi, Matthieu 16:13. Ya kele... Oh, beto ke vutuka kaka mpe ke tanga yawu, na manima kieleka beto ke kuzwa yawu. Matthieu kapu ya 16, mpe nzila ya 13. Beno kuwa mbote ntangu yayi na yina beto ke tanga 16:13, “Ntangu Pierre kwizaka...” To:

Ntangu Yesu kotaka na mikidi ya Césarée ya Philippe, yandi yifulaka bilandi ya yandi, na kutubaka, Nani bantu ke tuba... munu Mwana ya muntu kele?

Mpe bawu tubaka, Bayankaka ke tuba... nge kele Jean Mubotiki: bayankaka, Elie; mpe bayankaka Jérémie, mpe, to mosi ya bapofete.

Yandi tubaka na bawu, Kasi nani beno ke tuba ti mu kele?

Mpe Simon Pierre vutulaka mpe tubaka, Nge kele Klisto, Mwana ya Nzambi ya moyo.

Mpe Yesu vutulaka mpe tubaka na yandi, Ya kusakumuna nge kele, Simon mwana ya Jonas: ... samu ti nsuni mpe menga ve me monisa yawu na nge, kasi Tata ya munu yina kele na mazulu.

Mpe mu ke tuba... na nge, Ti nge kele Pierre, mpe na zulu ya ditadi yayi mu ke tunga dibuundu ya munu; mpe myelo ya difelo ke nunga yawu ve.

Mpe ntangu yayi... Mpe mu ke pesa nge bafungula ya kimfumu ya mazulu: mpe nyonso yina nge ke kangisa na ntoto ke vwanda ya kukangisa na mazulu: ... mpe nyonso yina nge ke zibula na ntoto ke vwanda ya kuzibula na mazulu.

Na manima yandi tumaka bilandi ya yandi ti bawu zolaka tuba ve na muntu ti yandi vwandaka Yesu Klisto.

¹²⁴ Beno kuwa mbote ntangu yayi. Mbote mingi. “Samu ti ntangu ke banda... Na ntangu yina bandaka yandi...” Mu zola kuzwa yankaka, beno lenda tanga yawu tii na yisi, kukuma na nzila ya 28 awa, samu ti beno lenda tanga yina ya yawu me bikana ntangu beno ke kwenda na yinzo.

Ya kieleka—Ya kieleka mu ke tuba na beno, Ya ke vwanda na bayankaka ya kutelama awa, bayina ke meka ve lufwa, tii bawu ke mona Mwana ya muntu kukwiza na kimfumu ya yandi.

¹²⁵ Oh, beno banza na yawu! “Bayankaka ya kutelama awa, bayankaka ya kutelama awa, ke meka ve lufwa tii bawu ke mona Mwana ya muntu kukwiza na kimfumu ya Yandi.” Wapi mutindu ya kutuba! Mutindu bantu ya kutonga ke zolaka kubaka yawu mpe kulakisa kaka mutindu kizoba yandi kele, beno me mona. Mutindu yandi ke zolaka kusimba yawu, mpe ya salamaka mpe bawu zabaka ve kima na zulu ya yawu. Beno me mona? Mbote mingi.

126 Na manima Pierre salaka funguna ya ditadi, yina beto zaba ti funguna ya yandi kele. . . Yandi zolaka tunga Dibuundu ya Yandi na zulu ya ditadi mosi yayi. Pierre ve, vwandaka ditadi ya fyoti, mutindu bantu ya Catholika ya Rome ke mekaka na kutuba yawu. Kasi funguna ya Pierre ya Luzayikisu, ya kele Dibuundu. Nzambi ke monikisa Yawu; funguna ya muntu yayi ve, samu ti na manima yandi me retrogradé. Ve lufungulu ya Yandi na kuvwandaka Mwana ya Nzambi; samu ti bawu zabaka ti Yandi vwandaka Mwana ya Nzambi, Pierre kutubaka yawu. Kasi yinki ya vwandaka, ya vwandaka, Luzayikisu yina kumonanaka katuka Mazulu ti Yandi vwandaka Mwana ya Nzambi. Yandi tubaka, “Nsuni mpe menga ata mbala mosi ve me tuba yawu na nge, kasi Tata ya Munu yina kele na Mazulu me monikisa yawu na nge. Mpe na zulu ya ditadi yayi, na ditadi yango ya funguna, mu ke tunga Dibuundu ya Munu, mpe myelo ya difelo ke sala ve yimbi. . . ke nunga Yawu ve.”

127 Mu banza ti beto ke luta ve ntangu mingi awa ntangu yayi, ti beto lenda kota mbala mosi na yayi. Mpe beto ke zola kumona mutindu yawu ke luta na kati ya moyo ya muntu. Ya kele disolo ya kitoko kaka awa kana beto lenda kuma kaka na yawu. Mbote mingi. Yinga, ditadi ya funguna, yina Pierre vwandaka. . . Yandi ke tunga Dibuundu ya Yandi na zulu ya funguna ya Pierre. Yandi tubaka, “Bayankaka ya kutelama awa ke meka ve lufwa tii bawu ke mona Mwana ya Nzambi kukwiza na Kimfumu ya Yandi.”

128 Ntangu yayi, beno bambuka moyo, Yandi zonzaka “bayankaka.” Yina vwandaka mosi ya kulutila, ve? *Bayankaka* zolaka vwanda mingi, “kulutila mosi.” Kasi ntangu yayi beno tala, bilandi ya Yandi nyonso vwandaka ya kutelama kuna, mpe Yandi vwandaka yufula mosi na mosi ya bawu, “Yinki beno ke banza na *yayi*? Mpe yinki beno ke banza na *yina*?” Kasi Yandi tubaka, “Ya kele na bayankaka ya beno ya kutelama awa, bayankaka ya kutelama awa, ke meka ve lufwa tii bawu ke mona Mwana ya muntu kukwiza na Kimfumu ya Yandi.” Oh, la la! Wapi mutindu ya kutuba! Beno banza na yawu, bamvula mafunda zole me luta ti ya tubamaka.

129 Ya ke. . . ke. . . Ndinga ya Nzambi ya ke kondwaka ve? Konso Ndinga yina Yandi tubaka ke salama?

130 Ntangu yayi, kana beto zola, kubaka kuna kapu ya 17 ya Matthieu yina ke landa. Ntangu Yandi bakaka. . . Bilumbu fyoti na manima ya yawu, Yandi nataka Pierre, Jacques, mpe Jean, kuna na mongo, na lweka, samu na kuvwanda bambangi. Pierre, Jacques, mpe Jean; mpe bawu kumonaka Kimfumu ya Nzambi kukwiza na ngolo, bawu monaka nkwizulu ya Kimfumu ya Nzambi kuvutukila. Amen! Oh, ba kotisaka bawu na kutala mbote Kimfumu ya Nzambi kuvutukila na yina Yawu vwandaka kwiza, nkotolo ya Milenyome. Bawu monaka kuvutukila.

¹³¹ Mwa ntangu fyoti me luta...nkonga ya milongi, Oral Roberts vwandaka mosi ya bawu. cecil B. DeMille, ntangu yandi sonikaka *Balutumu Kumi* yayi, yandi bokilaka Mpangi Shakarian, Mpangi Roberts, milongi mingi na kizunga na yinsi, mulongi nyonso zolaka kwiza, mpe bokilaka bawu na kukwiza na studio ntete filme kubasika, mpe kubikaka bawu kutala kuvutukila ya yawu ntete ba lakisa yawu, ntangu bawu vwandaka lomba makumi zole na tanu ya ba-dollar na tike. Kasi yandi . . .Bawu monaka kuvutukila ya yawu, ti bawu lendaka pesa dibanza ya bawu kana ya vwandaka na kutonga na zulu ya yawu to yina zolaka tubama, mpe nyonso yina. Bawu kumonaka yawu ntete ti bantu nyonso kumona yawu.

¹³² Mpe Yesu tubaka, “Bayankaka ya beno ya kutelama awa” (Amen!) “ke meka ve lufwa tii bawu ke mona Kimfumu ya Nzambi kukwiza na ngolo,” to, “ke mona Mwana ya muntu kukwiza na Kimfumu ya Yandi,” na kisika. “Ke mona Mwana ya muntu kukwiza na Kimfumu ya Yandi!” Bilumbu fyoti na manima ya yawu, Yandi bakaka Pierre, Jacques, mpe Jean, mpe mataka mongo ya zulu, mpe kuna Yandi kukitukaka na ntwala ya bawu. Mwini, vwandaka sema, ya zolaka vwanda ve mutindu ya bilele yina Yandi lwataka. Bambala yikwa beto me tutaka yawu na bingana, beto fyongoninaka yawu na Biblia!

¹³³ Beno lenda baka kitini mosi ya Masonuku mpe kuvukisa Biblia nyonso kintwadi na yawu. Yinga, tata. Ata nzila mosi kele kisika mosi! Yawu kele nyonso ya kufuka na ngolo ya Nzambi. Dyabulu zolaka luta ve kana yandi zolaka. Ya kele kieleka. Yandi lenda ve kukota na bantu yango ya santu bayina tulaka kimbangi ya bawu kuna mpe me kwikila na kimfumu ya Nzambi, mpe me baka konso Disonuku mpe me fuka Yawu na ngolo ya Mpeve-Santu, me sukula Yawu na Menga; yinza lenda kota ve na yawu, dyabulu lenda kota ve na kati ya yawu. Ba kele ya kufwa, luzingu ya bawu kele ya kubumbama na nzila ya Kidimbu ya Nzambi, na Mpeve-Santu. Wapi mutindu dyabulu lenda kwamisa bawu? Hmm! Bawu yina, na nkadulu yayi ntangu yayi.

¹³⁴ Kuna na kisika yayi, kuna, yandi monaka Nkwizulu, to kuvutukila. Mpe yinki vwandaka ya ntete, kumonaka . . .kima yina yandi kumonaka? Kima ya ntete yandi kumonaka na Nkwizulu vwandaka Moïse, yina vwandaka talisa basantu ya kufwa yina ke vumbuka na lufwa. Elie vwandaka ya kutelama kuna.

¹³⁵ Oh, mu zola beno kubakula yina ke salama. Kuna vwandaka Moïse, na ntete; ya kele bansungi nyonso yayi sambanu yina vwandaka ya kulala, bansungi ya dibuundu sambanu. Yina kaka ve, kasi Elie vwandaka kuna; munati-nsangu ya kilumbu ya nsuka, na nkonga ya yandi, ya kukituka, ke Zanguka. Amen! Ntangu yayi na bilumbu ya ntwala; na kuvingilaka Nkwizulu.

136 Mpe yinki bawu nyonso...? Bawu nyonso vukanaka na Yandi. Oh, la la! Yinki ya vwandaka? Nsilulu ya Yandi na Pierre, Jacques, mpe Jean, kunungamaka. Ya kele kieleka. Samu ti Yandi tubaka, “Bayankaka ya kutelama awa ke meka ve lufwa tii bawu ke mona Mwana ya muntu kukwiza na Kimfumu ya Yandi,” mpe bawu kumonaka kuvutukila ya yawu. Na yina na manima ya yayi, na manima ya mvumbukulu. . .

137 Mu ke zola kunata na beno kima yankaka; na manima Yesu kufwaka, ba me zika, na Santu Jean 21:20. Bantu yankaka yina zola kutonga bandaka yayi na bilumbu ya ntama. Kaka na yina beto kele na lesu yayi, beto sungika yawu. Na Santu Jean 20:21, Yesu kutanaka na bilandi ya Yandi, disaka bawu mbisi mpe dimpa na zulu ya tiya. Mpe na yina bawu vwandaka mata simu, Jean kuyekamaka na zulu ya ntulu ya Yandi; mpe Pierre pesaka kyuvu, yandi tubaka, “Yinki ke salama na muntu yayi?” Yesu vwanda zolaka Jean, Jean vwandaka muntu ya zola. Mpe yandi tubaka, “Yinki ke salama na muntu yayi? Yinki ke vwanda nkadulu ya yandi? Yinki ke vwanda bkilumbu ya yandi na ntuala?”

138 Mpe Yesu tubaka na bawu, “Yinki ya kele samu na beno kana yandi zinga tii Mu ke kwiza, tii Mu ke vutuka? Yinki ya kele?”

139 Mpe bilandi salaka foti, bawu tubaka ti “Yesu tubaka ti—ti—ti ‘yandi zolaka zinga tii Nkwizulu.’”

140 Kasi Yesu salaka ata foti ve. Kaka awa na Apocalypse, na kapu ya 4, Klisto zitisaka Ndinga ya Yandi! Yandi matisaka Jean na Mazulu mpe vutukilaka kima ya muvimba na yandi. Nkembo! Yandi—yandi monaka kumona ya ntete. Yandi monaka yawu kaka mutindu ti yandi zingaka na zulu ya ntoto mpe yandi monaka bansungi nyonso ya dibuundu kusalama, na nkwizulu ya Mfumu, Buku nyonso ya Apocalypse. Oh, la la!

141 Beno me mona mutindu bansilulu ya Yandi ke kondwaka ve? Ntangu yayi, beno kele ya kusoola. . . Jacques na kusala yawu; Jean, muntu nyonso ya bawu yankaka; zolaka bika ve Paul kumona yawu, kutuba yawu, kima mosi ve.

Yandi tubaka, “Yinki ya kele samu na beno kana yandi zinga tii Mu ke kwiza?”

142 Mpe na kuvwandaka yawu bawu tubaka ti, Yandi me soola kaka Jean mpe me matisa yandi mpe me lakisa yandi kima ya muvimba ntete yandi kufwaka, kaka mutindu ti yandi zingaka kima ya muvimba. Me lakisa yandi yina ya zolaka vwanda! (Mpangi Pat, ya kele mbote ve?) Oh, beno me mona, me baka yandi mbala mosi na zulu. Kaka awa, kapu ya 4 mpe nzila ya 2, ke siamisa yawu. “Yandi lakisaka yandi bima yina vwandaka, yina kele, mpe yina ke kwiza.” Yandi lakisaka yandi nsungi ya dibuundu, nkwizulu ya ba-Juif, kumwangana ya biwoni, Enlevement, Nkwizulu dyaka, mpe Millenium, mpe Yinzo ya Seko ya baya Yandi ya Kuvuuka; kaka mutindu ti yandi zingaka

kaka na kima yango muovimba, mpe yandi kumonaka yawu nyonso kusalama. Beno me mona? Beno me mona? Yandi me matisa yandi kaka mpe lakisaka yandi filme ti Yandi ke na kuvutukaka, ti yandi mona kima nyonso kuvutukila. Oh, la la!

¹⁴³ Yandi kubakamaka na zulu. Kunungisaka nsilulu ya Yandi na—na Apocalypse 4:2. Ntete yandi kufwa yandi kubakamaka na zulu na Kimpeve mpe monaka kaka bima mutindu ti yandi zingilaka. Yandi—yandi monaka yawu nyonso kuvutukila. Na yina yandi monaka, na vision, kieleka yina zolaka salama mpe yinki salamaka na zulu ya ntoto kubanda ntangu yina tii nkwezulu ya Mfumu Yesu. Ba lakisaka yandi yawu na vision.

¹⁴⁴ Na yawu kuna bilandi. . . to muntu ve yina tubaka ntete ti Yandi zolaka kwiza na nsungi yina. Yandi tubaka, “Yinki ya kele samu na beno kana, (na mutindu yankaka), kana yandi zinga tii Mu ke kwiza?” Na yina Yandi matisaka yandi mpe vutukilaka kaka kima na yandi mpe lakisaka yandi yina zolaka salama. Oh, mu zola kaka yawu. Hmm. Oh, la la!

¹⁴⁵ Beno tala ntangu yayi, beto mona yinki yayi vwandaka:

Mpe na mbala mosi mu kotaka na kimpeve: mpe, tala, kiti ya kintinu kutulamaka na mazulu, mpe muntu vwandaka na zulu ya yawu, na zulu ya kiti ya kimfumu.

¹⁴⁶ Ya vwandaka na “Ndinga” yina bokilaka yandi. Oh, Ndinga yango! Oh, mu lenda katukila yawu ve, Ndinga yango ya Muntu yina na manima ya yandi. Na yina yandi talaka kuna, mpe Yandi lakisaka yandi bansungi nyonso ya dibuundu, samu ti yandi vwandaka ya kutelama *na kati* ya bansungi ya dibuundu, minda sambwadi ya wolo. Na manima yandi kuwaka Ndinga yango na manima bansungi ya dibuundu me suka; Ndinga yango bikaka ntoto, kwendaka na zulu. Ntangu Yandi kotaka na Nkembo, yandi kuwaka Yandi kutuba, “Mata awa! Mu ke lakisaka nge yina ke salama na bilumbu na ntwala.” Oh, la la!

¹⁴⁷ Ndinga yango! Beto zonzila na Ndinga yango minuti; mu kele na Masonuku ya kusonika awa. Beto kwenda na ya Ntete ya Thessaloniens 4, mpe beno kuwa kaka awa yina Ndinga yayi ke tuba. Oh, beto nyonso zaba yina Yawu ke tuba, kukondwa. . . na ntwala beto tanga yawu, mutindu yina ve? Beto zaba yina ke salama. “Mpungi ya Nzambi ke bula mpe bayina kufwaka na Klisto ke vumbuka.” Ya kele kieleka? Beno bayina ke na kusonikaka yawu, na ya Ntete ya Thessaloniens 4:16 mpe 17, “Ndinga,” Ndinga yina vwandaka Ndinga ya Klisto. Ya kele kieleka? Ndinga ya Klisto!

Samu ti. . . mpungi ya Nzambi ke wakana, mpe bantu ya kufwa na Klisto ke vumbuka ntete:

. . . beto bayina kele moyo mpe bikanaka ke bakama kintwadi na zulu na bawu. . . samu na kukutana Mfumu na zulu: mpe kuna ke vwanda ntangu nyonso na Mfumu.

148 Ndinga mosi yina bokilaka Jean, “Mata,” Ndinga mosi yina tubaka na Jean, “Mata,” ya kele Ndinga mosi yina ke bokila Dibuundu kilumbu mosi (Amen!), ke bokila Dibuundu.

149 Mpe, Ndinga mosi yina bokilaka Jean na kumata, kele Ndinga mosi yina bokilaka Lazare ya kufwa na kubasika na ndyamu, Ndinga mosi ya archange. Klisto kele Ndinga ya archange, “Ndinga ya archange,” beno me mona. Oh, Ndinga yango ya mpungi ya Klisto kubokilaka Jean na kumata, Ndinga yango mosi kubokilaka Lazare. Beno talaka na ndyamu ya Lazare, Yandi zonzaka na Ndinga ya nene. (Tubaka kaka ve, “Lazare, basika.”) “*Lazare, basika!*” Yandi bokilaka yandi na lufwa.

150 Mpe yandi vutulaka, “Munu yandi yayi.” Mpe yandi basikaka na lufwa, na manima yandi vwandaka ya kufwa mpe nzutu ya yandi ya kubola.

151 Ndinga mosi yina tubaka na Jean, “Mata awa, Mu ke lakisa nge mwa bima yina ke na kukubamaka na kusalama.”

152 Ndinga mosi yango yina ke wakana ntangu bantu ya kufwa na Klisto ke vumbuka, “Samu ti Mpungi. . .” Mpungi! Yinki kele mpungi? Ndinga ya Klisto, yina Mosi kuwakanaka mpe bokilaka yandi na zulu. Yandi kuwaka Ndinga mutindu makelele ya mpungi mpe tubaka, “Mata awa!” Beno me mona mutindu mvumbukulu ke vwanda? Ya ke vwanda na ntangu mosi, na kukanga ya disu. Makelele yango ya pwelele ya Ndinga, mpe Yandi ke bokila Dibuundu, na kubokilaka, “Basika na yawu.” Ndinga yango ya kubokila ya nene. Nzambi, sadisa munu na kuwa Yawu kilumbu yina.

153 Mutindu mu ke tubaka ntangu yankaka. . .Mu zaba ti, mutindu muntu ke kufwa, Rodney, mu zaba ti ya kele na kyelo mosi ya nene ya ndombe yina kele na ntwala ya munu, ba ke bokilaka yawu lufwa. Ntangu nyonso yina ntima ya munu ke bulaka, munu na kubula mosi kele pene-pene na kyelo yango. Mosi ya bilumbu yayi mu fwana kota na yawu. Kasi mu zola ve kukota mutindu muntu ya bumolo, na kudilaka mpe kuboka. Mu zola kukota na yayi, ya kufuka munu mosi na ba-robe ya ludedomo ya Yandi, na kuzabaka yayi: ti mu zaba Yandi na ngolo ya mvumbukulu ya Yandi; ti kilumbu mosi ntangu Yandi ke bokila, mu ke basika na kati-kati ya bantu ya kufwa; ntangu Yandi ke bokila munu na kotalana na Zulu, ntangu mpungi ya Nzambi ke wakana mpe bantu ya kufwa na Klisto ke vumbuka, kana mu kele moyo, mu ke soba na ntangu fyoti, na kukanga ya disu, mpe ke kwenda na bayankaka ya bawu, samu na kukutana Mfumu na zulu. Ndinga ya mpungi yango, ke wakana pwelele, na ngolo. Hmm. Oh, ya ke vwanda mutindu mosi, mutindu mosi na Nkwizulu ya Yandi.

154 Ya kele ve na makelele ya ntembe na Yawu. Ya vwandaka ve na kima ya ntembe na Jean ntangu yandi kuwaka Ndinga yango kutuba, “Mata!” mpe yandi kwizaka. Amen.

155 Ntangu Lazare, na lufwa, na ndyamu; mpe moyo ya yandi, bilumbu yiya na nzyetolo kisika mosi, Mu zaba ve kisika ya vwandaka, mu banza ve kana mosi ya beto zaba. Ata kisika ya vwandaka, ya salaka ata fyoti ve ya luswaswanu. Yandi salaka kaka mbokolo na muntu yina misyete ya mpusu vwandaka kudya nzutu ya yandi; ya vwandaka basika nsunga, na ntoni. Makelele yango ya pwelele ya Mpungi tubaka, “Lazare, basika!” Kuna muntu, yina vwandaka ya kufwa mpe ya kubola, kuninganaka yandi mosi mpe basikaka na ntoni, na kutambulaka. Kima ve ya ntembe na yawu, ya kele yawu bankundi? Ata ntembe na kuna!

156 Ya kele kima mosi na nkokila yayi, ntangu makelele ya pwelele ya Ndinga ke tuba, “Musumuki, balula ntima, Mu ke pesa nge Luzingu ya Seko.” Beno balula ntima, mosi na mosi ya beno, mpe beno botama na Nkumbu ya Yesu Klisto samu na lemvo ya masumu ya beno, mpe beno ke kuzwa dikabu ya Mpeve-Santu. Ya kele mbokolo. Ya kele na kima ya ntembe ve na Yawu.

157 Mu kele mhangi ti Yawu kele kieleka. Ya kele na bambangi yankaka, mafuku ya bawu na yinza ya muvimba bubu yayi, yina kele mhangi ti ya kele Kieleka. Ntangu Biblia ke kwiza, Bandinga ya Nzambi, konso Ndinga ya Nzambi kele mpungi. Makelele nyonso ya Ndinga kele mpungi, mpungi ya Nsangu ya mbote. Mpe ntangu Yawu ke wakanaka, ya kele Kieleka. Ntangu Yawu ke tuba, “Yesu Klisto, mutindu mosi mazono, bubu yayi, mpe ntangu nyonso,” ya kele ve na kima ya ntembe na Yawu. Yandi kele mutindu mosi! Yinga, tata.

158 “Beno balula ntima ya beno, beno botama na Nkumbu ya Yesu Klisto, beno ke kuzwa dikabu ya Mpeve-Santu.” Ya kele ve na kima ya ntembe na Yawu.

159 “Yandi yina ke kuwa Bandinga ya Munu mpe ke kwikila na Yandi yina fidisaka Munu kele na Luzingu ya Seko. Yandi yina ke kwikila na Munu, ata ti yandi vwandaka ya kufwa kasi yandi ke zinga. Yandi yina ke zingaka mpe ke kwikilaka na Munu ke kufwa ata mbala mosi ve. Nge me kwikila yawu?” Ya kele ve na kima ya ntembe na Yawu, “Yandi ke zinga!”

160 “Yandi yina ke kudyaka nzutu ya munu mpe ke kunwaka Menga ya munu kele na Luzingu ya Seko, mpe Mu ke vumbula dyaka yandi na kilumbu ya nsuka.” Ya kele ve na kima ya ntembe na Yawu; kima ve; Yawu kele makelele ya kieleka.

161 Oh, mu zaba Yawu, mu kuwaka Yawu kuwakana na ntima ya munu ya mawa ya Irlandais kilumbu mosi, munu, mwa musumuki ya ntama. Wapi mutindu ya zolaka sala samu na munu? Kasi mu ke kwikila ti Yawu vwandaka makelele ya kieleka, mu ndimaka Yawu. Mu kele mhangi ti Yawu kele kieleka.

162 Kilumbu mosi Yandi ke bokila dyaka, beto ke basika na yinza. Samu ti ya kele na ata ntembe na mpungi *yango*. Inga, tata. Yinga, tata, ata makelele ya ntembe, na ntangu mosi.

163 Yandi ke wakana bubu yayi ntangu Yandi ke bokila beto, ya kele kaka mutindu mosi na ntangu Yandi ke tubaka na beto kima mosi.

164 Ntangu yayi, beto vutuka na nzila:

*Mpe . . . tala, kiti ya kimfumu kutulamaka na mazulu,
(nzila ya 2) mpe muntu vwandaka na zulu ya yawu.*

165 Beno simba, “kiti ya kimfumu,” Yandi vwandaka na zulu ya Kiti ya kimfumu. Yandi vwandaka dyaka ve kuna na yisi na minda awa, na zulu ya ntoto. Enlevement me salama yimeni. Yandi vwandaka na Nkembo, na kuvwandaka na Kiti ya Yandi ya kimfumu. Mu zola beno kutala na yisi, beto ke tala mpe na kapu ya 5, ya vwandaka ve Kiti ya kimfumu ya kyadi. Ya vwandaka dyaka ve Kiti ya kimfumu ya kyadi, ya vwandaka Kiti ya kifumu ya lufundusu. Ya vwandaka ve Kiti ya kimfumu ya lemvo, ya kele Kiti ya lufundusu samu ti tiya mpe lusyemo mpe bidumu kubasikaka na yawu; dyaka ve, kyadi me suka, nsungi ya Dibundu me manisa. “Yandi yina kele yimbi kusala dyaka yimbi; yandi yina kele ya kudedama kuvwanda dyaka ya kudedama; yandi yina kele santu kuvwanda dyaka santu,” Kele dyaka ve Kiti ya kimfumu ya kyadi.

166 Na nkokila yayi, Menga kele na zulu ya Kiti ya kimfumu mpe ya kele kiti ya kyadi samu na konso musumuki yina ke na sosaka kyadi. Kasi na kilumbu yango, ya ke vwanda ve na kiti ya kyadi kuna, ya ke vwanda kiti ya lufundusu na Nzambi ya kudasuka ya kuvwanda kuna. “Wapi kisika . . . Kana ludedomo kuvuuka na mpasi, wapi kisika musumuki mpe yimbi ke monana?” Mpe ntangu Yandi ke kwiza na matuti ya nkembo ya Yandi, myongo ke meka na kuzwa kisika ya kubumbama. Wapi kisika *beto* ke vwanda, na ntangu yina?

Oh, ntalu kele yinto yango
Yina ke kumisa munu mpembe mutindu mvula
mpembe;
Mu zaba ve yinto yankaka,
Kima ve kasi Menga ya Yesu.

167 Oh, la la, wapi mutindu ya leso! Ya kele ve na ata makelele ya ntembe! Mpe Kiti ya Yandi ya kimfumu:

*. . . mpe Yandi vwandaka na zulu ya kiti ya Yandi ya
kimfumu. (Yandi kele dyaka ve awa.)*

168 Ntangu yayi, yina kele kima yankaka, ya kele kusiamisa ti Dibundu ke bakama na ntwala ya Lukwamusu. Beno me mona? Samu na yinki? Awa Yandi kele na zulu ya Kiti ya kintinu na Nkembo, mpe Klisto me kwenda, mpe na manima ke kwiza Lukwamusu.

169 Mu ntangu nyonso ke tubaka na bilumbu ya Noé, Noé vwandaka na nzasa na ntete ti mvula kubwa. Lot vwandaka na ngaanda ya Sodome ntete ti tiya kubwa. Mpe Dibuundu ke kota na Nkembo ntete ti atomique kubwa. Ya kele kieleka, ntete atomique kubwa.

170 Beno ke tuba, “Wapi mutindu samu na mosi yina ya ntete?” Ya vwandaka na mimpani, Miklisto ve.

171 Ntangu yayi, beno tala. Oh! Yandi manisaka kisalu ya Yandi na ntoto mpe Yandi me baka Dibuundu ya Yandi, mpe awa Yandi ke fidisa lufundusu. Yinza kumangaka Yandi, mpe Yandi fidisaka lufundusu ya Yandi. Yandi mpe Dibuundu ya Yandi me kwenda na Nkembo.

172 Jean, kuna na kisanga ya Patmos, mumoni na dibuundu, me vwanda kifwanusu ya Dibuundu yina kele ya kuzanguka na Nkembo, “Mata awa!” Na kulakisaka . . .

Beno ke tuba, “Yandi monikisaka Dibuundu?”

173 Na muntu nyonso yina ke kuwa Ndinga ya yayi, Jean monikisaka yandi. Amen! Jean vwandaka kifwani ya Menga ya Yesu Klisto, kimbangi ya Ndinga. Yandi vwandaka mbingi ya mbotika ya Mpeve-Santu, na ngwisani ya muntu yandi mosi na Klisto, mpe yandi monikisaka Dibuundu ya muvimba; ti, konso bakala to kento, mwana ya bakala to mwana ya kento yina ke kwikilika na Klisto, kundima Yandi na bayinsi mosi, yandi ke bokilama kilumbu mosi, “Mata awa!” ke bakama na ntwala ya Lukwamusu. Beno bambuka moyo, ntangu ya Lukwamusu me banda ntete ve.

174 Yayi kele ntangu, ya kuvwanda na lufundusu. Jean ke na kulakisa ntangu yayi yinki ke salama na manima ya nsungi ya Dibuundu. Beno me mona? Mutindu yina, ya vwandaka.

175 Ntangu yayi, beno tala dyaka na nzila ya 3, to ya 2, “Kiti ya kimfumu ya kuvwanda na Mazulu, mpe Mosi kele ya kuvwanda na zulu ya Kiti ya kimfumu.” Ntangu yayi, Mpeve mosi yina vwandaka na ntoto, me bika mpe me kwenda na Nkembo, mpe vwandaka ya kuvwanda (Yesu mosi yina kele na beto na nkokila yayi) na kyadi, Kukwendaka na Nkembo mpe na kuvwandaka na zulu ya Kiti ya kimfumu.

Mpe yandi yina vwandaka ya kuvwanda na zulu ya Kiti ya kimfumu vwandaka talana na zulu mutindu ditadi ya zape mpe . . . sandwani: mpe ya vwandaka na mukyama vwandaka zunga kiti ya kimfumu, na kumona mutindu emelode.

176 Mu ke sukisa, samu ti ya kele na bampangi yankaka yina ke longa.

Mu banza ti mu ke baka yawu na suka, kaka awa. Mpe na yawu, “ke talana mutindu emelode.” Oh, la la! Oh!

Ya kele pene na bisika nyonso bantu,
 Bayina bantima kele nyonso na tiya (Beno ke
 zolaka yawu ve?)
 . . . Tiya yina kubwaka na Pentecote,
 Yina sukulaka mpe vedisaka bawu;
 Oh, Ya ke na kupela ntangu yayi na kati ya
 ntima ya munu,
 Nkembo na Nkumbu ya Yandi!
 Mu kele na kyese mingi ti mu lenda tuba ti mu
 kele mosi ya bawu.

177 Jean, ba bokilaka mpe kubokilamaka na Mfumu Yesu, kusilamaka na Nzambi kuna ti yandi zolaka mona nkwezulu ya Mwana ya muntu. Pierre, Jacques, mpe Jean, mpe bayankaka vwandaka kuna, ntangu Yesu tubaka na bawu mpe tubaka, “Ya kele na bayankaka awa ke meka ve lufwa tii bawu ke mona Mwana ya muntu kukwiza.” Yandi tubaka ve *nyonso* yina vwandaka ya kutelema kuna, kasi *bayankaka*. Mpe bawu kwendaka, bilumbu fyoti na manima ya yawu, mpe monaka ndonga ya mvumbukulu kuvutukila, mpe nkwezulu ya Mfumu.

178 Elie vwandaka monisa basantu ya kufwa. . . mu zola tuba Moise, mpe ke vumbuka na lufwa. Elie vwandaka monikisa nkonga ya bayina ke zanguka. Beno bambuka moyo, Moise vwandaka ntete, mpe na manima Elie. Elie zolaka vwanza munati-nsangu ya kilumbu ya nsuka, yina vwandaka na yandi mpe kimvuka ya yandi yina ke kwiza na mvumbukulu. . . ke kwiza. . . mbote, ya ke kwiza Enlevement, mu zola kutuba. Moise kotisaka mvumbukulu mpe Elie kotisaka nkonga ya Enlevement. Mpe, kuna, bawu zole kumonana kaka kuna.

179 Mpe na manima ya mwa ntangu fyoti bawu talaka kuna, mpe bawu monaka, mpe Pierre tubaka, “Beto tunga ba tabernacle tatu. Ti mosi kukwenda na yisi ya musiku, mpe ti mosi yankaka kukwenda na yisi ya Elie, mpe beto kota (bayankaka ya bawu) *yayi* kele nzila.”

180 Mpe na yina bawu vwandaka tuba dyaka, Ndinga zonzaka mpe tubaka, “Yayi kele Mwana ya Munu ya luzolo, beno kuwa Yandi.” Mpe ntangu bawu talaka, bawu monaka Yesu kaka, nyonso kukotaka na Muntu mosi. Oh, mpe Yandi vwandaka Nsemo, Kieleka, Nzila, Kyelo, Mukyama.

181 Oh, mbasi beto ke kuyzwa dilongi ya nene, kana Mfumu zola. Wanzio beto ke baka “balufundusu”; beto ke baka “ditadi ya sandwani,” kumona yinki ya ke monikisa, wapi kitini ya bulaka. Mpe beto ke bakaka “zape” mpe beto ke baka. . . matadi nyonso yankaka, mpe beto ke baka bayayi nyonso na kulutilaka na Ezéchiél, na kuvutukaka na Genèse, kuluta na Apocalypse, kukwiza na kati-kati ya Biblia, kuvukisa yawu kintwadi, matadi mpe bantinta nyonso yayi, mpe nyonso yina. Mpe kuna beto ke nata yawu mbala mosi na manima na yawu mpe kumona kana

ya kele kiekeka ve. Beno me mona? Kumona kana ya kele ve ntinta mosi mpe nyonso, kaka kima mosi. Mpe ti Mpeve-Santu mosi, Nzambi mosi, na kulakisaka bidimbu mosi, mambu mosi ya nene, na kusalaka kima mosi yina kaka mutindu Yandi silaka!

¹⁸² Yandi tubaka na Pierre, Jacques, mpe Jean, mpe bayankaka yina vwandaka ya kutelama kuna, na bilandi ya Yandi nyonso, tubaka, “Bayankaka ya beno ke mona ve lufwa tii bawu ke mona Mwana ya muntu kukwiza na Kimfumu ya Yandi.”

¹⁸³ Yandi tubaka na Jean, tubaka . . . Pierre tubaka, “Yinki Nge ke sala na yandi? Yandi . . . Muntu yina—yina, yinki ke salama na yandi?”

¹⁸⁴ Yandi tubaka, “Yinki ya kele samu na beno kana yandi kumona Munu kukwiza?” Mpe Yandi bikaka yandi kuzinga samu na kumona yawu! Na manima bayankaka ya bawu kufwaka mpe kwendaka, Jean zingaka samu na kumona nkwezulu ya Mfumu kuvutukila na ngolo, dyambu nyonso kuvwandaka kunbanda ntangu ya yandi tii Balufundusu ke suka mpe Millenium ke kota. Jean monaka konso kitini ya yawu, mpe Millenium kuluta, mpe kubanda ya Nsungu ya Kimfumu. Na yawu Yandi ke zitisaka Ndinga ya Yandi, Ve?

¹⁸⁵ Beto ke baka yawu na nzila ya 2. Kana Mfumu zola, beto ke banda na nzila ya 3 na suka.

Beto kulumusa bayintu ya beto.

¹⁸⁶ Bantu yikwa na nkokila yayi, na dibuundu yayi, yina zaba, mpangi ya munu ya bakala, ti, (mpangi ya kento), ti ba ke bokila beno kilumbu mosi, kana beno kele ya kukubama to ve? Ata ti beno kele ya kuyilama to ve, ba ke bokila beno na kukutana na Nzambi. Mpungi yina ke wakana; mpe ntangu yawu ke wakana, ya ke wakana samu na kitumbu ya beno, na kisika beno ke zinga dyaka ve mpe ba ke kwamisa beno na dibulu ya dyabulu ya difelo na kutala mafuku ya bamvula, to ya ke bokila beno na Zulu na kukutana na Basantu ya nkembo.

¹⁸⁷ Kaka kieleka mutindu Nzambi zitisaka Ndinga ya Yandi na Pierre, Jacques, mpe Jean; kaka kieleka mutindu Yandi zitisaka Yawu na Jean ya luzolo, mumoni; kaka kieleka mutindu Yandi zitisaka nsilulu ya Yandi na nzila ya bansungi ya dibuundu; ya kele kieleka yina Yandi silaka na bilumbu ya nsuka yayi yina Yandi zolaka fidisa mvula ya nsuka mpe ke vutula Mpeve mosi yina vwandaka na zulu ya ntoto kati na Yandi, Nsemo ke kwiza na ntangu ya nkokila mpe ke lakisa Ngolo mosi, bidimbu mosi, mpe nyonso yina Yandi salaka na kilumbu ya Yandi Yandi ke lakisa dyaka yawu na “Kyelo ya kuzibuka” yayi na kilumbu ya nsuka.

¹⁸⁸ Yawu yayi awa! Beto kele na Yawu kaka na beto ntangu yayi, Mpeve-santu, Yesu Klisto, mutindu mosi mazono, bubu yayi, mpe kukondwa nsuka. Beno kele . . . Yawu ke na kulongaka beno, Yawu ke na kulongisaka beno, Yawu ke na kumekaka na

kusala beno kumona yina kele kieleka mpe luvunu. Yawu kele Yandi mosi Mpeve-Santu ke na kuzonzaka na nzila ya bikoba ya muntu, na kusalaka na kati-kati ya banzutu ya bantu, na kumekaka na kulakisa kyadi mpe lemvo.

¹⁸⁹ Mpe kana beno me kuzwa Yandi ntete ve, mpe na nkokila na Ntwala ya Mvula ya Malu-malu yayi beno ke zola kutelemisa maboko ya beno na Nzambi mpe kutuba, “Nzambi, bika mu kuzwa Ngolo yina vwandaka na Jean mumoni, ti ntangu ba ke bokila munu ti mu monika na ntwala ya Nge na ngemba mutindu yandi vwandaka”? Beno telemisa diboko ya beno. Nzambi sakumuna nge. Nzambi sakumuna nge. Bisika nyonso kaka na dibuundu. Nzambi sakumuna nge. “Ti mu vwanda ya kukubama na kupesa mvutu na mbokolo ya munu.”

¹⁹⁰ Tata ya beto ya Mazulu, na yina mpimpa ya Mvula ya Malu-malu yayi. . . kaka pene ya bangunga zole na ntangu yayi mpe ya ke luta, ya ke vwanda na mvula ya malu-malu. Yina beto me sala mvula yayi beto me sala. Bima mingi ti mu me sala, yina, mu kele na nsoni ya munu msoi; mu me balula ntima ya yawu, Mfumu.

¹⁹¹ Mpe ya kele na bima mingi yina mu me sala yina mingi ya bankundi ya munu me bakula ve. Mingi ya bampangi ya munu kuna na bilanga ya kulonga me bakula ve samu na yinki mu me sala yawu. Kasi, Tata, mu salaka yawu samu ti mu vwandaka ya kutwadisa na kusala yawu. Mu ke sambila, Tata, ti Nge ata mbala mosi ve ke bika munu kuvwanda na nsoni ya ntwadusulu yango. Kasi twadisa munu, Mfumu, na kulandila na kusala mutindu mu kele ya kutwadisa na kusala. Sadisa munu, Nzambi, samu ti mu zola kieleka kuzaba luzolo ya Nge, ti mu lendaka sala yawu na kunata (mutindu Nge lakisaka munu bamvula mingi me luta ntangu mu bikaka dibuundu yayi) Dimpa ya Luzingu na bantu ya yinza. Ntangu mu monaka mongo yina ya nene ya Dimpa, mpe Basantu ya kulwata ba-robe ya mpembe bayina katukaka ntoto nyonso samu na kudya Dimpa yayi ya Luzingu. O Nzambi, ti munu—O Nzambi, ti munu ata mbala mosi ve, ata mbala mosi ve kukondwa kudikisa bantu na Dimpa ya Luzingu.

¹⁹² Sakumuna moyo ya nsatu yayi na kati awa bayina me telemisa maboko ya bawu ntangu kaka yayi. Bawu kele na nsatu na ya kulutila Luzingu. Mu ke sambila ti Nge ke fulusa bawu na Mpeve-Santu, Mfumu, mosi na mosi ya bawu. Nzambi, pesa yawu. Pesa bawu balusakumunu. Sadisa bampangi ya beto, bisika nyonso.

¹⁹³ Sakumuna bampangi ya beto milongi bayina ke na kukubamaka dyaka na kubelama, awa na ntangu fyoti, bayankaka ke zonza. Beto ke sambila ti bawu ke pesa beto na nkokila yayi Dimpa ya Luzingu, Tata, na yina beto ke kuwa mbote-mbote mpe na buzitu nyonso na kuwa Ndinga. Pesa yawu.

¹⁹⁴ Sakumuna beto. Mpe bika ti mvula ya malu-malu yayi kuvwanda na bivuvu ya malu-malu, na kunataka mabanza ya malu-malu, baluzayikisu ya malu-malu, ngolo ya malu-malu, oh, nyonso. Ti ya vutuka dyaka na beto, Mfumu, balusakumunu mpe bansilulu ya Nge. Bero me bika beto mosi, na kisambu ya beto, na maboko ya Nge. Na Nkumbu ya Yesu Klisto. Amen.

Matondo na beno, bampangi ya munu ya babakala mpe bampangi ya munu ya bakento.

¹⁹⁵ [Mpangi Neville ke na kuzonza: Mu kele ya kundima ti beto nyonso lenda sepela beto vwandaka na mbangu ve mpe beto zolaka sepela kaka mingi na kulantilaka na kuwa Mpangi Branham awa na nkokila yayi na kunatilaka beto nsangu yayi. Mpe ya kele nsangu yina ke pesaka beto ngolo samu beto zaba ti Nzambi kele na kati ya Yawu. Amen.] Lukumu na Mfumu!

¹⁹⁶ [Mpe na yina Yandi tubaka Yandi kieleka kele na lenda ya kusala yawu tii na nkwizulu ya Yandi dyaka.] Inga. [Mpe Yandi ke sala yawu, kaka yina ve, mu ke tubaka bambala mingi ti . . . beto ke tubaka bambala mingi na bantu, “Nge ke kwikila ti Yesu Klisto lenda belusa nge?” mpe, kieleka, beno lenda ntangu nyonso kuzwa bawu kundima yawu. Kasi dyambu na yawu kele, “Nge ke kwikila ti Yandi ke belusa nge *ntangu yayi?*”] Amen! [Kuna bantangu yankaka bantu ke tubaka, “Mbote, mu zaba ve.”]

¹⁹⁷ [Mama yina me kufwa na lupitalu, mu kwendaka na mona yandi, mu tubaka, “Mpangi ya kento, nge ke kwikila dyak ti Yesu ke vulusaka?”]

[Yandi tubaka, “Yinga, mu ke kwikilaka yawu.”]

[Mu tubaka, “Nge ke kwikila ti Yesu Klisto ke belusaka?”]

[Yandi tubaka, “Yinga, tata, mu ke kwikilaka yawu.”]


[Mu tubaka, “Nge ke kwikila ti Yandi ke belusaka nge ntangu kaka yayi?”]

[Yandi tubaka, “Yina mu zaba ve.”]

[Mpe mu tubaka, “Mpangi ya kento, nge lenda zaba yawu samu ti nsilulu kele samu na nge.”] Amen! [Amen. Yandi salaka nsilulu.]

¹⁹⁸ [Ntangu yayi, na yina beto ke kuwa mosi ya bampangi ya beto yankaka awa. Beto kele na mingi awa mpe yayi. . . Na mpimpa ya Mvula ya Malu-malu, beto kele ve na manaka yina beto kubikaka na ntwala. Beto ke vukanaka kaka mpe ke bikaka Nzambi kusala mutindu Yandi ke nata mpe ke twadisa.] Amen! [Mpe beno zaba, ya me kuma bilumbu tuka beto me kuwaka Mpangi Pat Tyler mpe kupesa kimbangi ya yandi to nyonso yina Mfumu me tula na ntima ya yandi. Mpe beto ke lomba na Mpangi Pat na kunata nyonso yina Nzambi me tula na ntima ya yandi.]

¹⁹⁹ [Kasi ntete yandi kwiza, mpangi mosi ya bakala ya Muklisto ya mbote na manima kuna, Mpangi Randall Hyman, mpe yandi kele awa mpe yandi kele na talanta ya Mfumu na kuyimba mpe beno zaba, mu me zola kaka ti yandi kele na kiyeka ya kusadila talanta yango samu na Nkembo ya Nzambi, na yawu mu ke lomba Mpangi Randall kana yandi ke zola kukwiza mpe kuyimba samu na beto. Yandi me yimbilaka beto mbala mosi to zole awa mpe ke lomba yandi na kusadila dyaka talanta ya yandi na nkokila yayi samu na Mfumu Yesu, kana yandi zola. Kana yandi ke kwiza ntangu yayi samu na kuyimba samu na beto. Yandi kele na mwa bana kuna yina yandi ke na kusadisaka, kasi mu banza ti yandi lenda bika ntangu yayi samu na kwiza mpe kuyimba samu na beto.]

²⁰⁰ [Na yina yandi ke na kusalaka yawu, beto kele mpe na Mpangi Kinder na manima awa, mpangi ya bakala ya luzolo ya Pentecotiste, beto kele na kyese samu na yandi. Mpe beto kele na Mpangi-bakala J. T. Parnell na manima kuna kisika mosi, mu banza ti yandi kele kaka ya kuvwanda na manima awa na ngaanda ya ndonga. Mpe kyese mingi samu na bampangi nyonso yayi ya Baklisto,] Beeler *kuna*. [bampangi ya babakala ya lukwikilu. Mpe beto tala,] Mpangi Beeler kele na manima kuna. [Mpangi Beeler kele na manima *awa*, mpe. Yinga. Mpangi Beeler kele awa mpe. . .—Mu.] 

APOCALYPSE, KAPU YA YIYA KITINI YA I KNG60-1231
(Revelation, Chapter Four Part I)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na nkokila, na kilumbu ya 31 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org